

Բ Ա Ն Ա Վ Ե Ճ Դ Ի Տ Կ Ս Ց Ց Ի Ի

ՈՐՏԵՂ Է ԳՏԵՎԵԼ ՄՈՎՍԵՍ ԽՈՐԵՆԱՅՈՒ ՀԻՇԱՏԱԿԱԾ ԲՅՈՒԹԱՆԻԱՆ

Ա. Վ. ՄՈՒՇԵՂՅԱՆ

Գերմանացի արևելագետ Ալֆրեդ Գուտշմիդը Մովսես Խորենացու «Հայոց պատմության» անդրադարձել է երկու ուշագրավ ուսումնասիրությամբ: 1876 թ. ապրիլի 23-ին Լայպցիգի Սաքսոնական թագավորական գիտական ընկերության նիստում՝ թագավորի ծննդյան օրվա առթիվ, նա հանդես եկավ «Մովսես Խորենացու Հայոց պատմության արժանահավատության մասին» բանախոսությամբ: Գուտշմիդի ուսումնասիրությունը պարունակում էր աղբյուրագիտական լուրջ դիտարկումներ և բազմաթիվ սրամիտ կոահումներ Խորենացու անձի, մատենագրական ժառանգության և հատկապես «Հայոց պատմության» գիտական արժեքման վերաբերյալ: Պահպանելով գիտական վստահություն և ընդհանուր դրական վերաբերմունք Խորենացու անձի, նրա ապրած ժամանակի և նրա Պատմության հետապնդած շահերի նկատմամբ, հեղինակն այսուհանդերձ բացահայտում է պատմական անձերի ժամանակակցության մի շարք անպատեհություններ և այլ կարգի ժամանակագրական շեղումներ, մատնացույց անում այն փաստը, որ Խորենացին, չնայած իր հավաստիացումներին, որոշ սկզբնաղբյուրների ծանոթ է միայն Նվսեբէոս Կեսարացու միջնորդությամբ: Այդ ելույթը հաջորդ իսկ տարին լույս տեսավ հայերեն թարգմանությամբ՝ մի վերնագրով, որ ինքնին արտահայտում էր գերմանացի հայագետի դիտողությունների գնահատականը¹:

1883 թ. Բրիտանական հանրագիտարանի 9-րդ հրատարակության 16-րդ հատորում Գուտշմիդը գետնից մի նոր հոգված՝ «Մովսես Խորենացի» վերնագրով², որտեղ ջանում էր սկզբունքորեն ճշտել իր դիրքը Խորենացու ապրած դարի և նրա «Հայոց պատմության» գրության ժամանակի հարցում: Այստեղ նա բացեիքաց հայտարարում է. «Այս ընթացքում խորանալով հետազոտություններ Խորենացու հաղորդած մի քանի կեղծ վկայությունները վերաբերում են և իր անձին»։ «Պատմություն հայոց»-ի հեղինակը ոչ թե V դարի հռչակավոր թարգմանիչն է, այլ նրա դիմակի տակ հանդես եկող մի հայ, որ գրել է 634—642 թթ.: Դրա ապացույցն են հանդիսանում մի կողմից ամբողջ երկի միջով անցնող և Պատմության հետ հաճախ սերտորեն առնչված ուշ ժամանակաշրջանի աշխարհագրական ու ազգագրական անվանացանկը և այդօրինակ անախրոնիզմները, մյուս կողմից այն, որ Պատմության և Աշխարհացույցի հեղինակները միևնույն անձն են, որի մասին, անկասկած, վկայում են ոչ միայն աշխարհագրական տեղանիքների նույնությունը, այլև

¹ Գերմաներեն լույս է տեսել երկու անգամ՝ Alfred von Gutschmid. „Über die Glaubwürdigkeit der armenischen Geschichte des Moses von Khoren“: Berichte über die Verhandlungen der königlich-sächsischen Gesellschaft der Wissenschaften zu Leipzig. Philologisch-historische Classe. Achtundzwanzigster Band. Leipzig. 1876. S. 1—43. Նույնի՝ Kleine Schriften. Bd. III. Leipzig. 1892. S. 282—331.

² Գերմանացի Կուլշմիթ գիտնականին Խորենացուն վրա ըրած դատաստանը. Թարգմ. Հ. Ն. Ջնաոյան.—«Բազմավեպ», ԼՆ, 1877, էջ 45—51, 110—116, 213—222, 289—302:

³ Alfred von Gutschmid. Moses von Khoren. Encyclopaedia Britannica, ninth edition, volume XVI (1883). p. 861—863. Հոգվածի գերմաներեն բնագիրը հրատարակվեց հեղինակի «Մանր երկեր» հինգհատորյակում՝ Alfred von Gutschmid. Moses von Chorre.—Kleine Schtlfiten. Bd. III, S. 332—338.

մի շարք խիստ առանձնահատուկ ընդհանրություններ (Berührungen) — Աշխարհացույցի հայտնած կարծիքը, առանց այլևայլության, վճռորոշ է (հորենացու) Պատմության համար⁴:

Այս երկրորդ ելույթը հայ իրականության մեջ ընդունվեց խիստ բնականաբար⁵։ Վենետիկյան Մխիթարյաններից Բարսեղ Սարգիսյանը ծառացավ հիմնականում հորենացուն վերադրված Մար-Աբասյան աղբյուրի «կեղծիքի» դեմ։ Բայց այն փաստերը, որոնցով Գուտշմիդը հակադրվում էր հորենացու V դարին պատկանելու ավանդական պատկերացմանը, այնպես էլ մնացին չհերքված։ Որպես աշխարհագրական ու պատմական անախրոնիզմի նմուշներ Գուտշմիդն այստեղ բերում է հորենացու Պատմության մեջ հիշատակված Ջորջորդ Հայկ և Բյուքաճիա անվանումները։ Քննենք այդ անախրոնիզմները զատ-զատ։

Հորենացին պատմում է, թե ամբարիշտ Հուլիանոսը՝ հռոմեացիների կայսրը, Տիգրանի վրա կատարած արշավանքի ժամանակ փոքրից վիրավորվելով մեռնում է Պարսկաստանում։ Նոր ընտրված կայսր Հուրիանոսը նահանջում է զորքի հետ։ Պարսից Շապուհ թագավորը հետապնդելով հունական զորքին, հասնում է մինչև Բյուքաճիա և այնտեղ նստում շատ ամիսներ, բայց չկարողանալով ոչինչ անել, ծովի մոտ մի սյուն է կանգնեցնում՝ վրան դնում առյուծ, ոտքերի տակ մի գիրք, որ նշանակում է՝ ինչպես առյուծը հզոր է զազանների մեջ, այդպես է և պարսկական (պարսից արքան) թագավորների մեջ։ Իսկ գիրքը, որ շտեմարան է իմաստության, հռոմեացիների տերությունն է (պատկերում)⁶։

Առաջին հեղինակը, որի մոտ շփոթմունք է առաջացել Բյուքաճիայի տեղագրման հարցում, Մովսես Կաղանկատվացին է։ Ի դեպ, «Աղվանից սյամա-մության» հեղինակը հատիկ-հատիկ հավաքել է հորենացու Պատմության մեջ եղած բոլոր այն տեղեկությունները, որոնք, նրա կարծիքով, կարող էին կապ ունենալ Աղվանքի հետ։ Ուստի պատահական չէ, որ առաջին դրքի ժողովուրդն նա իրար ետևից մեջ է բերում հորենացու վկայությունները հյուսիսային (կովկասյան) ցեղերի մասին, որոնք Ճորա կապանից (դռնից) դուրս գալով՝ չորս տարի բանակ դրին Աղվանքի սահմաններում⁷, իսկ հետո խոսվություն բարձրացրին Շապուհ արքայի դեմ⁸։ Որքան էլ տարօրինակ է, վեր-

⁴ Encyclopedie Britanica. vol. XVI, p. 862B. Kleine Schriften, Bd. III, S. 335-336. Ընդամենը, Ա. Գուտշմիդը հաստատում է Հ. Կիպերտի և Ք. Պատկանյանի կարծիքը, որ Աշխարհացույցը VII դարի գործ է, և փորձում է մի քանի տվյալներով ճշտել այն ժամանակահատվածը, որում գրվել է Աշխարհացույցը՝ Բասրա (Բծրա) քաղաքի հիշատակումը (Աշխարհացույց, էջ 41), որ արաբները հիմնել են 635 թ., արաբների տիրապետության հատուկ նշանակությունը, որոնք Հայաստան մտան, Գուտշմիդի կարծիքով, 651 թ. (ըստ Հյուրշմանի՝ 641 թ.), Թրակիայում սլավոնների (սկլավների) բնակվելու փաստը (Աշխարհացույց, էջ 16), որի մասին Աշխարհացույցի հեղինակը, հավանորեն տեղյակ է այն պատերազմից, որը 657 թ. Վոստան II կայսրը մղեց նրանց դեմ (Kleine Schriften, S. 337, n. 1, 2).

⁵ Բ. Սարգիսյան. Ա. Կուշմիթի համապատումն Բրիտանական և եղծ կարծյաց նորա, — «Բազմավեպ», ԽԴ, Վենետիկ, 1886, էջ 1-15:

⁶ Մովսիսի հորենացու Պատմություն հայոց. Տիգրիս, 1913, Բ, հ, էջ 206. Գ, հ, էջ 275. Գ, ժր, էջ 277. «Ինքն (Շապուհ) գնեալ յունական զօրուն կրթէր, և հաւալ ի Բիւթանիա, և նստէր ամիսս յոլովս: Եւ ոչ ինչ կարացեալ առնել՝ սին առ ծովուն կանգնել, և առիւծ ի վերայ դնել, մատեան ընդ ոտիւքն ունելով, որ նշանակէ այսպիսի ինչ. բանդի առիւծ հզօր է ի զազանս, նոյնպէս և պարսկականն ի թագաւորս. և մատեան ծոցովիւ է իմաստութեան, որպէս Հռոմայեցոց տիրութիւնն» (էջ 277):

⁷ «Բայց Շապուհ Որմզդեան առ Տիրան մեր արքայ առաւել սէր հաստատեաց. մինչև զօրավիդն օգնականութեան եղեալ՝ թափլ զնա յարձակմանէ հիւսիսականացն ազգաց, որք միաբանեալ ելին արտաքս քան զկապանն Ճորայ և բանակեցան ի սահմանս Աղուանից ամս շորս» (հորենացի, Գ, ժր, էջ 270):

⁸ «Ընդ այնոսիկ ապա ժամանակս յարեալ խոսվութիւն արքային Պարսից Շապուհ ի հիւսիսականաց ազգաց» (հորենացի, Գ, ժթ, էջ 277):

շին դեպքի հետ էլ Կաղանկատվացին կապում է Շապուհի արշավանքը մինչև Բյութանիա. ժրագաւորեալ Տիրանայ Հայոց՝ առնէ խաղաղութիւն ընդ Պարսս. և լեալ օգնական Շապուհ, թափէ զնա ի յարձակմանէ հիւսիսայնոցն, որք ամս շորս ընակեալ Աղուանս նեղէին զՀայս: Ապա ըստ բարուց շարին Տիրանայ կուրանայ ի Շապուհ: Եւ Արշակ՝ նորին որդի առնու զթագաւորութիւնն: Ի նմին ժամանակի եղև խռովութիւն Շապուհ յազգացն հիւսիսոյ. և նա անցեալ ի Բիւթանիա՝ նստի ամիսս յոլովս և ոչ կարաց առնել ինչ: Ապա սիւն առ ծովակին կանգնեալ և առիւծ ի վերայ՝ մատակ⁹ ընդ ոտիւքն ունելով՝ նշան իմն կոչել առիւծ զՊարսս և մատակ՝ զՀռովմայեցւոց տէրութիւնն¹⁰:

Դժվար չէ պատկերացնել, որ Կաղանկատվացու մոտ Բյութանիան հայտնւրվել է Կովկասյան լեռներէից հյուսիս, ինչ-որ ծովակի ափին, որտեղ Շապուհն իբր առնուծ ու գիրք պատկերող սյուն է կանգնեցրել: Այս շփոթմունքը, հավանորեն, պետք է բացատրել նրանով, որ Կաղանկատվացու ձեռքի տակ եղած Խորենացու Պատմութեան գրչագրում «(Շապուհ) զհետ յունական զօրուն կրթէր, և հասեալ ի Բիւթանիա»¹¹ խոսքում յունական աղավաղված է եղել հունական, որի պատճառով էլ Շապուհը հետապնդել է ոչ թե հուններին, այլ հոններին: Թերևս այս է պատճառը, որ «Աղվանից պատմութեան» հեղինակը Խորենացու հաղորդումները ետևառաջ կցելով իրար՝ Շապուհ թագավորի արշավանքը կապել է Կովկասի հյուսիսային ցեղերի՝ հոնների հետ և այնպես է կարծել, թե Բյութանիան գտնվում էր Կովկաս լեռների այն կողմում: Իրականում, խոսքն այստեղ 363 թ. պարսկա-հռոմեական պատերազմի մասին է:

Առարկելով Խորենացուն, Ա. Գումշմիդը հերքում է 363 թ. պարսից թագավոր Շապուհի Բյութանիա հասնելու փաստը, դիտել տալով, որ պարսիկներն առաջին անգամ Բյութանիա են հասել միայն 608 թ.¹², այն երկարամյա պատերազմի ժամանակ, որ պարսից արքայից արքա Խոսրով II-ն իր բարեբար Մորիկ (Մավրիկիոս) կայսեր սպանութեան վրեժն առնելու համար մղում էր նրան հաջորդած բյուզանդական կայսրեր Փոկասի և Հերակլի դեմ: Ինչպես վկայում է Աբեհուսը, Խոսրով II-ի զորավար Խոռյամը պատերազմում այնքան հաջողութուն ունեցավ, որ հասավ մինչև Քաղկեդոն¹³, որ գտնվում էր Բյութանիայում՝ Բոսփորի նեղուցի ափին. «Եւ եղև յայնմ ժամանակի դիմեաց զնաց Խոռեամ զաւրու իւրով ի Քաղկեդոն, և բանակեցաւ դէմ յանդիման Բիւղանդիայ, և խնդրէր անցանել և գերել զքաղաքն թագաւորանիստ (Կոստանդնուպօլիս)»¹⁴:

Արդ, եթե Խորենացուն ծանոթ է պարսիկների Բյութանիա հասնելու պատմական փաստը, ուրեմն նա ապրել է այդ դեպքին հաջորդած ժամանակաշրջանում, Ա. Գումշմիդի կարծիքով՝ VII դարի առաջին կեսին:

Գերմանացի հայագետին հետևելով, 608 թ. վկայակոչում է և Գր. Խալաթյանցը. «Սա մեկն է Խորենացու մոտ եղած այն ցցուն անաքրոնիզմն»

⁹ Մատակ պարսկերեն՝ մատյան, գիրք:

¹⁰ Մովսէս Կաղանկատուացի. Պատմութիւն Աղուանից աշխարհի. Երևան, 1983, Ա, Ժգ, էջ 30—31:

¹¹ Խորենացի. Գ, Ժբ, էջ 277:

¹² Alfred von Gutschmid. Kleine Schriften, Bd. III, S. 335, n. 2.

¹³ Քաղաք Բյութանիայում Բոսփորի նեղուցի ափին, Գոնտական ծովի մուտքի մոտ (Strabonius. Geographica, Parislis, 1853, XII, 4, 1—2): Հմտ. Աշխարհացոյց, էջ 13՝ «Քաղկեդոն Բիւթանացւոց»:

Պարսից զորավար Խոռյամը գրավեց Բյութանիայի Քաղկեդոն քաղաքը ոչ թե 608 թ., ինչպես կարծում է Ա. Գումշմիդը, այլ Խոսրով II-ի թագավորութեան Ն-երորդ տարում (Սեբեոս, ԱԸ, էջ 123), այն է՝ 624 թ., կամ Ն-երորդ տարում (Մովսէս Կաղանկատուացի, Պատմութիւն Աղուանից աշխարհի, Երևան, 1983, II, 9, էջ 128)՝ 625 թ.: Խոսրով II Ապրիլի դաճ է բարձրացել 590/1 թ.:

¹⁴ Պատմութիւն Սիւրեոսի. Երևան, 1979, գլ. ԱԸ, էջ 122:

րից,—գրում է նա,—որոնք բացահայտում են նրա Պատմությունը շարադրելու ժամանակը, որ, համենայն դեպս, VII դարից այն կողմ չի անցնում, ինչպես նկատել է Ա. Գուտշմիդը¹⁵:

Ավանդական հորենացու շատագուցները, չկարողանալով հերքել Ա. Գուտշմիդի մեկնաբանումը, կամ լռության էին մատնում այդ փաստը, կամ վազույն դնում բավարարվում էին սոսկ այն հիշատակելով՝ խուսափելով յուրաքանչյուր հիշատակումից: Այդպես է վարվել, օրինակ, ակադ. Ստ. Մալխասյանցը հորենացու «Հայոց պատմության» աշխարհաբար թարգմանության ծավալուն ներածության մեջ¹⁶:

Նշված անաքոնիզմը հետազոտողների կողմից տասնամյակներ շարունակ ոչ միայն չհերքվեց, այլև գտավ նորանոր կողմնակիցներ: 1961 թ. «Հանդես ամսօրյա»-ի № 10—12-ում տպագրված «Կեղծ Մովսես հորենացու տարեթվի շուրջ» անգլերեն հոդվածում Կ. Թումանյանը կրկին անդրադարձավ այդ «անաքոնիզմ» ապացույցին՝ Մովսես հորենացու կեղծիքը բացահայտելու և այս անգամ արդեն նրան VIII դար փոխադրելու միտումով, նշելով, թե կեղծ Մովսեսը «խոսում է իրանցիների մի ներխուժման մասին մինչև Բյութանիա (Bithynia) Բյուզանդական կայսրության դեմ՝ դրած պատերազմում: Պատմության մեջ առաջին անգամ դա տեղի է ունեցել 604—629 թթ. պատերազմի ժամանակ»¹⁷:

Կրկնելով Կ. Թումանյանին, Ռ. Թոմսոնը հորենացու անգլերեն թարգմանության ներածության մեջ նույնպես մատնանշում է պատմական փաստի շփոթությունը Կեղծ Մովսեսի մոտ. «Մովսեսին հայտնի է իրանյան մի առաջխաղացում մինչև Բյութանիա. միայն 604—629 թթ. պատերազմի ժամանակ է, որ իրանցիները առաջացան այդքան արևմուտք»¹⁸: Հետևությունը պարզ է՝ VIII դարում ապրած կեղծ Մովսեսը ծանոթ է եղել VII դարի սկզբին տեղի ունեցած պատմական անցքին և այն վերագրել է IV դարի պարսից Շապուր Թագավորին:

Տեսնենք, թե ինչ են հաղորդում այս առթիվ IV դարի հռոմեական պատմագիրները, որոնք ժամանակակից ձև նշված պատմական անցուդարձերին: Ամմիանոս Մարկելինոսը, որ ուղեկցել էր Հուլիանոսին նրա շատ արշավանքների ժամանակ, հորենացու նման, բայց շատ ավելի հանգամանորեն պատմում է 363 թ. Հուլիանոս կայսեր Պարսկաստան կատարած արշավանքի մասին, որը զորքով պաշարում է Տիգրոնը¹⁹, բայց համառ դիմադրության հանդիպելով և մթերքի սակավության պատճառով, ստիպված է լինում հանջել և Մումբրե (Ջոսիմոսի մոտ՝ Suma—III. 30,3) բերդաքաղաքից ոչ հեռու մի մարտի ժամանակ, առանց զրահի նետվելով թշնամու դեմ՝ տեղի հարվածով խցվում է կողից ու լյարդից և նույն գիշերը մեռնում է վրանում 363 թ. հունիսի 26-ին (25.3,7): Հռոմեական զորքը հենց նույն տեղում

¹⁵ Г. Халатъянц. Армянские Аршакиды. М., 1903, часть I (Исследование) . 236—237.

¹⁶ Մովսես հորենացի. Հայոց պատմություն, աշխարհաբար թարգմանություն և ներածություն ակադեմիկոս Ստ. Մալխասյանցի. Երևան, 1961, էջ 53:

¹⁷ Cyril Toumanoff. On the date of Pseudo-Moses of Chorene—«Հանդես ամսօրյա», 1961, № 10—12, էջ 469. Տե՛ս նաև C. Toumanoff. Studies in christian caucasian history. Wetheren, 1953, p. 331. Հար է նշել, որ այս փոփոխարկն առաջ է դրվել ոչ թե Կ. Կոնիդերը «Բրիտանական հանրագիտարանի» 11-րդ հրատարակության մեջ (col. 898, n. 1), ինչպես երկու անգամ ծանոթագրում է Կ. Թումանյանը, այլ գերմանացի արևելագետ Ա. Գուտշմիդը նույն հանրագիտարանի 9-րդ հրատարակության մեջ 1888 թ.:

¹⁸ R. W. Thomson. Introduction, p. 59. In: Moses Khorenats'i. History of the Armenians. Cambridge (Massachusetts), London (England), 1978, տե՛ս նաև p. 272, n. 3.

¹⁹ Ammianus Marcellinus. Römische Geschichte (Rerum gestarum), lateinisch und deutsch. Mit einem Kommentar versehen von Wolfgang Seyfarth, in 4 Bänden. Berlin, 1970, XXIV. 8, 6.

կայսր է ընտրում Հորիանոսին, որը հարկադրված եղավ Շապուհի հետ հուլիսի սկզբին կնքել ճրեհնամյա հաշտություն, որ Ամմիանոսն անվանում է «ամոթալի դաշինք» (dedecore foedera—25. 9, 11): Այդ պայմանագրով հռոմեացիք Պարսկաստանին զիջեցին հարավային Հայաստանի հինգ նահանգներ՝ Աղձնիք, Մոկք, Ծավդեք (Զարդկից), Ռեհիմենե²⁰ և Կորդուք՝ 15 ամրոցների հետ միասին, ինչպես և Միջագետքի Մծրին և Սինգարա (Շնգար) քաղաքները և Castra Maurorum բերդը²¹:

Մյուս աղբյուրներն ավելի հստակ պատկերացում են տալիս պարսիկների առաջնադաս մասին, նշելով, որ բացի հայկական նահանգներից նրանց տիրապետության տակ անցավ և ամբողջ Ասորական Միջագետքը, որ Սփրատ գետով սահմանակից էր բուն Ասորիքին: Այսպես, V դարի հայ պատմիչ Փավստոս Բուզանդը ճշմարտացի արտացոլելով Հորիանոս կայսեր կնքած «ամոթալի դաշինքի» իրողությունը, հաղորդում է՝ հունաց թագավորը նեղն էր ընկել և նեղության տագնապի մեջ Լրդմնագիր (ուխտից նամակ) գրեց ու կնքեց, որով Շապուհ թագավորին զիջեց Մծրինն (նծրին) ու Ասորոց Միջագետքը²²:

Փավստոսի այս ուշադրավ տեղեկությունը հաստատում է և VI դարի բյուզանդական ժամանակագիր Մալալան, ըստ որի պարսից թագավոր Սաբորարշակիոսը (իմա՝ Շապուհը)²³, հենց որ լսեց Հուլիանոսի մահը, հաշտություն բանակցությունների համար Պերսարմենիայից Հորիանոսի մոտ ուղարկեց իր ամենաներքին նախարարներից Սուրենասին, և կնքված հաշտության համաձայն հռոմեացիները պարսիկներին հանձնեցին ամբողջ Մյուզդոնիա երկիրը՝ նրա Մծրին մայրաքաղաքով հանդերձ²⁴, այն է՝ հյուսիսային Միջագետքը²⁵:

Այնուհետև Ամմիանոսից տեղեկանում ենք, որ Հորիանոսը զորքի հետ նահանջեց Միջագետքով, Ասորիքով և Կիլիկիայում, Տարսուսի մոտ, Տավրոսի կիրճերից մեկում հողին հանձնելով Հուլիանոսի աճյունը, շարժվեց դեպի Կոստանդնուպոլիս՝ Լրկյուղ կրելով Պրոկոպիոսի ապստամբությունից, բայց Բյութանիա հանելով, հանկարծամահ եղավ 364 թ. փետրվարի 17-ին Գաղաստանա քաղաքում²⁶։ Բյութանիայի և Գաղատիայի սահմանագծում

20 Ռեհիմենե Ա. Գարազաշյանը նույնացնում է Հեր և Զարեանգ դավառների հետ (Քրե-նական պատմութիւն հայոց, մասն Գ, Թիֆլիս, 1895, էջ 85)։

21 Է. Հոնիգսմանը ենթադրում է, որ դա ներկայիս Բարին է՝ Իրաքում, Բաղդադից ոչ հեռու (E. Honigsmann, Die Ostgrenze des Byzantinischen Reichs. Bruxelles, 1935. S. 5, n. 3)։

22 Փավստոս Բուզանդ, Դ, իա, էջ 210—211. «Այլ իբրև եղև խաղաղութիւն ի մէջ թագաւորացն Յունաց և ի մէջ թագաւորին Պարսից Շապուհոյ, ուխտից նամակ գրեալ և վնթեալ տայր թագաւորն Յունաց թագաւորին Պարսից։ Եւ գրեալ էր յուխտից նամակին այսպէս. «Նստու քեզ, ասէ զնծրին քաղաք՝ որ է յԱրուեստանի և զՄիջագետս Ասորոց. և Մէշաշ-խորհին Հայոց՝ ձեռնթափ եմ, ասէ. թէ կարասցես յաղթել նոցա և արկանել ի ծառայութիւն, ես ի թիկունս ոչ եկից նոցա։ Արդ ի նեղ ուրեմն անգեալ թագաւորն Յունաց, և ի նեղին վշտի՝ դայս ձե օրինակի բանիցն կնքէր մուրհակ և տայր թագաւորին Պարսից. և ապա ճողոպրէր ի նմանէս։

23 Շապուհ Բ երկարակյացը (309—373) Սասանյանների տոհմից էր. այստեղ Արշակ պետք է հասկանալ արքա իմաստով։

24 Iohannis Malalae Chronographia, Lib. I, p. 335—336 (Migne. Patrologiae graecae. T. 97, col. 501)։

25 Ըստ Ստրաբոնի Մյուզդոնիա կոչվում էր լեռնային Միջագետքը Մասիոս լեռան հարավում, որի ստորաոտմ էր Նիսիբիս (Մծրին) քաղաքը, որ անվանում էին նաև Մյուզդոնիո Անտիոք. այդտեղ հիշվում են նաև Տիգրանակերտ և Խառան (Carral) քաղաքները (Strabo. XI. 14, 2; XV. 1, 2)։

26 Գաղաստանան գտնվում էր Բյութանիայում, Անկյուրայից դեպի Նիկիա տանող ճանապարհին, որոշակի տեղը հայտնի չէ։

(XXV. 10, 12): Ամմիանոսը վկայում է նաև, որ պարսից զորքը կրնակվոր հետևում էր նահանջող հռոմեացիներին և Միջագետքի ազատված քաղաքների ու բերդերի վրա բարձրացնում պարսկական դրոշմը:

Խորենացին, թեև շատ համոռոտ, բայց ճշգրիտ վերարտադրել է պատմական իրողությունը. «Այս Խոռոհրուտ դպիր եղեալ Շապուհ թագաւորին Պարսից, և ի ձեռս Յունաց անկեալ, յորժամ Յուլիանոս, որ և Պառաբատոսն²⁷, զօրու հանդերձ ի Տիգրոն շոգաւ, և ի մեռանելն նորա անդ, ընդ Յոբիանոս ի Յոյնս ընդ արքունական սպասաւորսն եկն...»²⁸. «Ջայսու ժամանակաւ թագաւորեաց Յունաց ամբարիշտն Յուլիանոս [...] Եւ յորժամ զնա ընդդէմ Պարսից իրաւունքն զինեցին, և անցեալ ընդ Կիլիկիայ հասանէր ի Միջագետս. և զօրացն Պարսից կողմնապահաց հատեալ զչուանս նաւակամբ ծիրատու, զգուշանային անցիցն: Իսկ Տիրան մեր Թագաւոր իջեալ ընդ առաջ Յուլիանոսի, դիմէ ի վերայ Պարսից զօրացն, և հալածականս առնէ [...] Եւ խնդիրս առնէ, զի մի տարցի զնա ընդ իւր ի Պարսսս²⁹—«Յետ այս ամենայնի ամբարիշտն Յուլիանոս ըստ արժանի խորհրդոցն վէր ընկալեալ ի փորոտիսն՝ սատակի ի Պարսս: Եւ զօրացն դարձեալ, թագաւոր ունելով զՅորիանոս, որ ի ճանապարհի վախճանեալ՝ ոչ ժամանեաց ի Բիւղանդիոն (Կոստանդնուպոլիս—Ա. Մ.), իսկ արքային Պարսից Շապուհ զհետ նոցա կրթեալս—«Ինքն (Շապուհ) զհետ յունական զօրուն կրթէր, և հասեալ ի Բիւթանիա, և նստէր ամիսս յովովս»³⁰:

Եթե Խորենացու մոտ բերված փաստերը համադրենք Ամմիանոսի հույժմանրակրկիտ նկարագրության հիմնական դրվագներին, կարելի է ասել, որ մեր Պատմահայրը թեև համոռոտ, բայց միանգամայն հարազատ է ուրվագծում պատմական դեպքերը՝ Հուլիանոսի արշավանքը դեպի Տիգրոն, նրա կործանումը, հռոմեական զորքի նահանջի ընթացությունը Տիգրոնից մինչև Բյութանիա, Հորիանոսի անակնկալ վախճանը Բյութանիայում: Այդ փաստերն առկա են նաև այլ հույն ու լատին հեղինակների մոտ: Միայն Շապուհի Բյութանիա հասնելու փաստն է, որ հայտնի չէ այլ աղբյուրներից: Մյուս կողմից, եթե անգամ Խորենացին ապրած լիներ VIII—IX դդ., դժվար է համոզվել, որ նրա նման ուշիմ պատմագիրն այդ աստիճան շփոթեր փաստերը և միամտորեն կամ թեկուզ միտումնավոր կերպով պարսից Խոռոհի զորավարի արշավանքը Բյութանիա վերադրեր IV դարի պարսից թագավոր Շապուհ Երկարակյացին: Ուստի տարակույս չի կարող լինել, որ այդ փաստը ևս Խորենացին գտել է այն աղբյուրում, որտեղից քաղել է մյուս ստույգ տեղեկությունները: Հենց Ամմիանոսի երկար ու ձիգ պատմածը համառոտելու դեպքում կարելի է այնպես պատկերացնել, թե Շապուհը, հետապնդելով հռոմեական զորքին, նրա նահանջի ճանապարհով Հորիանոսի հետքով հասել է մինչև Բյութանիա: Այսպիսի համառոտումները սակավ չեն հունա-հռոմեական մատենագրության մեջ:

Ի դեպ, IV դարի մի այլ հռոմեացի հեղինակ՝ Եվտրոպիոսը «Հռոմի հիմնադրումից սկսած» համառոտագրության մեջ հաղորդում է. «Եվ երբ զորքը ամեն բանի պակասություն էր զգում, նա (Հորիանոսը) մի քանի անգամ պարտություն կրելուց հետո, Շապուհի հետ հաշտություն կնքեց, թեև անհրաժեշտ, բայց անպատիվ՝ իբրև տույժ զիջելով Հռոմեական կայսրության սահմաններից մի քանի մարզեր, ինչ որ դրանից առաջ՝ Հռոմի հիմնադրումից հազար հարյուր տասնութ տարի անց երբեք չէր եղել: Մինչև անգամ մեր լեզուներին կավդիումի մոտ՝ Պոնտիոս Տելեսինոսի ձեռքով»³¹:

²⁷ Ուրացող, ուխտազանց, ուխտադրուժ (հուն.):

²⁸ Խորենացի, Բ, հ, էջ 206:

²⁹ Նույն տեղում, Գ, ժգ, էջ 270—271:

³⁰ Նույն տեղում, Գ, ժէ, էջ 275, ժը, էջ 277:

³¹ Per Pontium Telesinum. Պոնտիոս Տելեսինոս անձնանուն է, որ Եվտրոպիոսի լատիներեն բնագրում հավանորեն աղավաղված է: Տիրոս Լիվիոսի մոտ սամ-

և՛ Հիսպանիայում՝ նումանտիայի մոտ, և՛ նումիդիայում՝ անց կացրին լծի տակով, որպեսզի ոչ մի սահման չգիջվեր (թշնամուն)։ [...] Քանզի, թե՛ սամնիացիներին, թե՛ նումանտիացիներին և թե՛ նումիդիացիներին անմիջապես պատերազմ հայաարարվեց և հաշտությունը խափանվեց»³²։ Թեև Եվտրոպիոսը եվրոպական սլատմագիտության մեջ ճանաչված է իբրև ստուգապատում հեղինակ, լայն վերը բերված նրա վկայություններում լուրջ աղավաղում կա, նրա հիշատակած կավդիումի ճակատամարտը, երբ սամնիացիները հռոմեական պարտված լեգեոններին իբրև անարգանք զինաթափ անցկացրին նիզակի տակով, տեղի է ունեցել մ. թ. ա. 321 թ.³³, իսկ նումիդիայի ճակատամարտը՝ մ. թ. ա. 110 թ.³⁴, այնինչ Եվտրոպիոսի բնագրից այնպես է հասկացվում, թե այդ ընդ որովհետև դրվագները վերաբերում են 363 թ. պարսկահռոմեական պատերազմին³⁵։

Պարզվում է, որ Եվտրոպիոսն իր տեղեկությունները բաղել է Ամմիանոսի «Հռոմեական պատմությունից», և քանի որ վերջինս պատմելով Հոբիանոսի կրած ամոթալի պարտությունն մասին, այն համեմատել է պատմական հեռավոր անցյալում՝ 5—8 դար առաջ հռոմեական զորքի կրած խայտառակ պարտությունների հետ, ուստի Ամմիանոսի բնագրի անփույթ համառոտման պատճառով³⁶, այս միջանկյալ տեղեկությունները Եվտրոպիոսի մոտ սպրդել են բուն 363 թ. ղեկավարի շարադրանքի մեջ իբրև մասնական կից անցքեր։

Իր հերթին Եվտրոպիոսից այս ամբողջ հատվածը նույնությամբ փոխ է առել Լանդոլֆուս Սագասը (Սրամիտ) Պաուլուս Դիակոնի «Հռոմեական պատմության» իր հավելումներում³⁷։ Նշենք, որ Եվտրոպիոսի և Լանդոլֆուսի քննական հրատարակության լուսանցքներում մի առ մի ցույց են տրված բոլոր այն սկզբնաղբյուրները, որոնցից օգտվել են այդ հեղինակները, բայց Ամմիանոսից նրանց կատարած բանաբաղությունները, որ ցույց տվինք վերը, չեն նկատվել։ Ուստի այս փաստի վրա հրավիրելով մասնագետներին ուղարկությունը, ուզում ենք բնորոշել, որ Խորենացու արժանահավատության հարցը խստորեն քննելիս՝ ավելի անաչառ կլինեք նախ և առաջ նկատի առնել նրա օգտագործած սկզբնաղբյուրների վավերականությունը, որ մշտապես եղել է Պատմահոր մտահոգության առարկան։ Զուր չէ, որ, կարծես դիմելով ապագայի խստապահանջ քննադատներին, Խորենացին գրում է. «Եվ մենք ասում ենք, որ մենք այս պատմության մեջ ճշմարտախոս ենք եղել մեր դիտավորությանը և ուղղամտությանը. իսկ ինչ վերաբերում է նրանց, որոնցից հավաքել ենք, այդ աստծուն է հայտնի, նրանք գովելի են, թե պարսավելի, այդ մեզ չի վերաբերում, մենք հեռու ենք դրանցից»³⁸։

Սակայն վերադառնանք մեր բուն խնդրին.

Խեցիների գորագույն է և կոչված է Pontus Herennius (IX, 4. 1—3) կամ Pontium Herennii filium (հայց. հոլով) — Պոնտիոս Հերենիուսի որդի (IX, 1, 2)։

³² Eutropi Breviarium ab urbe condita, Berolini, 1897. Editio nova, 1961, X, 17, 1—2, p. 181.

³³ Titl Livi Ab urbe condita. Libri. Bd. III, Leipzig, 1854, IX, 1—12, p. 211—264.

³⁴ Caius Crispus Sallustius. De bello Iugurthino. Lipsiae, 1886, p. 38.

³⁵ Հոմերի հիմնադրման 1118 թ. համապատասխանում է մ. թ. 365 թ.։

³⁶ Օրինակ զեղչված է՝ ut temporibus praeclis apud Furcas Caudinas (Ammianus Marcellinus. Römische Geschichte, in 4 Bänden. Buch XXV. 9, 11) — «Ինչպես հեռավոր ժամանակներում կավդիումի դարպասների մոտ»։

³⁷ Landolfi Sagacis Additamenta ad Pauli Historiam Romanam. Berolini, 1879 p. 339.

³⁸ Մովսես Խորենացի. Հայոց պատմություն, թարգմ. Ստ. Մտիսայանցի. Ա, մթ, էջ 117։ Բնագրում՝ «Եւ ասեմք լինել արդարաբան ի պատմութեանս յայմիկ ըստ մերոյ յօժարութեան և ուղղամտութեան. իսկ ըստ որոց հաւաքումեն՝ Աստուծոյ լինել յայտնիս, և մարդկան զովելիս կամ րասրելիս. մեք այնոցիկ օտար և ի րաց կացեալ» (Ա, մթ, 1913, էջ 57)։

Արդյո՞ք պարսկական զորքը 604—629 թթ. կռիվների ընթացքում է միայն թափանցել պոնտական Բյութանիա, ինչպես պնդում են հետազոտողները Ա. Գուտշմիդից մինչև Ռ. Թոմսոն։ Այդ հարցին պետք է պատասխանել բացառաբար։ Որ պարսիկները Բյութանիան գրավել են նաև IV դարի առաջին կեսին, այդ մասին միանգամայն վստահելի տեղեկություն է տալիս Ամմիանոս Մարկելինոսը «Հռոմեական պատմության» մեջ։ Հերքելով իր պաշտելի Հուլիանոս կայսեր անվան շուրջ տարածված հերյուրանքները, թե նա իր ամբարշտ բնավորությամբ պարսիկներին գրգռեց հռոմեացիների դեմ և երկիրը ներքաշեց ավերիչ պատերազմների մեջ, Ամմիանոսը, պատասխանելով այդ զրպարտիչներին, բացահայտում է մեզ համար կարևոր պատմական փաստը. «Ոչ թե Հուլիանոսը, այլ Կոստանդիանոսն էր, որ բորբոքեց պարթևների թշնամանքը, քանզի նա հաճությամբ ընդունեց մի ոմն Մետրոդորոսի ընչաքաղց կեղծավորությունը, ինչպես ավելի վաղ մանրամասն հաղորդել ենք։ Նրա մեղքով է, որ մեր զորքերը սաստիկ հարվածներ կրեցին, մի քանի անգամ էլ ռազմական ջոկատները գերի ընկան, ամրությունները խլվեցին կամ քաղաքներն ավերվեցին, խորտակվեցին։ Պրովինցիաներից ծանր տուրքեր կորզվեցին և իրենց հավակնություններն իրագործելու համար պարսիկներն արշավեցին մինչև Բյութանիա և Պրոպոնտիայի ծովափը [...] Իսկ այս երիտասարդը գրեթե ապշեցուցիչ արագությամբ վերստին կարգի բերեց ամեն ինչ, երբ Կեսարի կեղծ տիտղոսով Արևմուտք ուղարկվեց, և թագավորները նվաստ ստրուկների նման ճողոպրեցին առջևից»³⁹։

Ամմիանոսի խոսքից («ut dudum rettulimus plene» — «ինչպես ավելի վաղ մանրամասն հաղորդել ենք») երևում է, որ «Հռոմեական պատմության» նախորդ, այժմ կորած գրքերից մեկում նա մանրամասն պատմած է եղել Մետրոդորոսի և Հռոմի կայսր Կոստանդիանոս Մեծի (առաջին) հետ կապված ինչ-որ միջադեպի մասին։

XI դարի վերջի և XII դարի սկզբի բյուզանդական մատենագիր Գեորգիոս Կեղրենոսը⁴⁰, որ ծանոթ է եղել Մետրոդորոսի արկածախնդրության վերաբերյալ Ամմիանոսի պատմածին, վկայում է, որ Կոստանդիանոս Մեծի թագավորության 21-րդ տարում (իմա՝ 325/6 թ.—Ա. Մ.), պարսից թագավոր Շապուհը զրպարտության հետևանքով հալածանք հարուցեց քրիստոնյաների դեմ և կոտորեց նրանցից 18 հազար մարդ, որի պատճառով խանգարվեց խաղաղությունը հռոմեացիների և պարսիկների միջև։ Այդ նշանակում է, որ Շապուհի արշավանքը Բյութանիա և Պրոպոնտիա տեղի է ունեցել 325/6 թ. հաջորդող տարիներին։

Աշխարհացույցը Բյութանիան տեղադրում է Հունական (Միջերկրական) ծովի հյուսիս-արևելյան ափին՝ Հելեսպոնտոսի հարևանությամբ⁴¹։ Այս և տալիս է հետևյալ նկարագրությունը. «Ա. Աշխարհ Ասիայ Բիթանիա. յեղից Կոստանդնուպոլսի, հանդերձ մտիք ծովագետին Պոնտոսի որ կռիլ Թրակական Փաւսփոռոս, մասամբ ինչ Պրոպոնտիա...»⁴²։ Պրոպոնտիսը կամ Պրոպոնտիան ներկայիս Մարմարա ծովն է։

Պարսիկների կողմից պոնտական Բյութանիա և Պրոպոնտիայի ծովափը ներխուժելու այս պատմական փաստը, որ գտնում ենք Ամմիանոսի մոտ, վերաբերում է Կոստանդիանոս առաջինի (305—337) կամ նրա հաջորդ Կոս-

³⁹ A. M. Ammianus Marcellinus. Römische Geschichte, XXV. 4, 23—24: „non Iulianum, sed Constantinum ardores Parthicos succendisse, cum Metrodori mendacis avidius acquiescit, ut dudum rettulimus plene, unde caesi ad indignationem exercitus nostri, capti militares aliquotiens numeri, urbes exclusae, rapta munimenta vel diruta provinciae gravibus impensis exhaustae et ad effectum tendentibus minis cuncta petebantur a Persis ad usque Bithynos et litora Propontidis“.

⁴⁰ Georgii Cedreni Compendium historiarum, cui subiunguntur (J.—P. Migne. Patrologiae graecae, t. 121, col. 561).

⁴¹ Աշխարհացույց Մովսեսի Խորենացու. Վենետիկ, 1881, էջ 11։

⁴² Նույն տեղում, էջ 22։

տանցիոս (Կոստանդ) կայսեր (337—361) տարիներին, և սրա հաստատումը գտնում ենք հենց Խորենացու մոտ: Պատմահայրը հաղորդում է, որ Շապուհ Որմզդյանը (Շապուհ II) հայոց Տիրան թագավորի (339—350) օրոք «Շատ ազգերից օժանդակութուն գտնելով՝ հարձակվեց Միջերկրեայքի և Պաղեստինի վրա»⁴³:

Ըստ Աշխարհացույցի Միջերկրայք կամ Միջերկրէ կոչվում է ընդհանուր Ասիայի նախակողմը, որ ընկած է Հունաց (Միջերկրական) ծովի և Պոնտոսի (Սև ծով) միջև⁴⁴, այսինքն այն թերակղզին, որ հույներն անվանում էին Անատոլիա (Արևելք) կամ Ասիա, իսկ VI դարից նաև Փոքր Ասիա⁴⁵: Միջերկրայքում Աշխարհացույցը տեղադրում է 17 երկիր, այդ թվում՝ Բյուժանիա, Գաղատիա, Կապադովկիա, Կիլիկիա և երեք Հայքերը: Տվյալ դեպքում Խորենացու վկայություն մեջ Միջերկրեայքը լիովին համընկնում է Աշխարհացույցի ընկալմանը: Եթե ի մի բերենք Ամմիանոսի և Խորենացու տվյալները, ապա կարելի կլինի ասել, որ հայոց Տիրան թագավորի և ուրեմն նաև Հռոմի Կոստանցիոս կայսեր տարիներին պարսից զորքը Շապուհ II-ի գլխավորությամբ ներխուժել է Միջերկրեայքի Բյուժանիա երկրամասը և հասել մինչև Պրոպոնտիայի՝ ներկայիս Մարմարա ծովի ափերը:

Շապուհ II-ի հարձակումը Միջերկրեայքի և Պաղեստինի վրա ենթադրել է տալիս, թե պարսիկները պետք է ներխուժած լինեն նաև Ասորիք: Դրա հաստատումը ևս գտնում ենք Ամմիանոս Մարկելինոսի մոտ՝ Բզարդեի ճակատամարտի նկարագրության մեջ: Կոստանցիոս (Կոստանդ) կայսեր վերջին ճակատամարտը պարսիկների դեմ, որ նկարագրում է և Խորենացին, տեղի ունեցավ 361 թ. աշնանը Բզարդե⁴⁶ բերդաքաղաքի համար (հյուսիսային Միջադեմքում՝ Ամիդից ոչ հեռու): Ճակատամարտի տասներորդ օրը, տեսնելով, որ քաղաքի պաշտպաններն անձնատուր չեն լինում, հռոմեացիները վճռեցին «պարիսպներին մոտեցնել այն վիթխարի խույր, որի հարվածներով պարսիկներն ավերել էին Անտիոքը: Սրանք հետո իրենց հետ խույր տարան Անտիոքից և թողեցին Կառհայում (Carrhae)»⁴⁷ (այստեղ՝ Կառհայում էլ հոյն ընկավ հռոմեացիների ձեռքը): Ամմիանոսի այս վկայությունը հաստատում է, որ նախքան 361 թ. Բզարդեի ճակատամարտը, պարսիկներն արշավել էին

⁴³ Խորենացի, Գ, Ժբ. Վրաց Շապուհ Որմզդեան առ Տիրան մեր արքայ առաւել սէր հաստատեաց. մինչև զօրավիզն օգնականութեան եղեալ՝ թափէ զնա յարձակմանէ հիսուսականացն ազգաց, որք միաբանեալ ելին արտաքս քան զկապանն ճորայ և բանակեցան ի սահմանս Աղուանից ամս շորս: Եւ զայլ յոլով թագաւորս նուաճեալ Շապհոյ, և զազս բարբարոսաց բազումս ի սատարութիւն կալեալ՝ յարձակեցաւ ի Միջերկրեայս և ի Պաղեստինէս:

⁴⁴ «Եւ է նախակողմն (vāg. նախ զկողմն) [ընդհանուր Ասիոյ] Միջերկրայք, որք մտանեն ընդ մէջ Յունաց ծովուն եւ Պոնտոսի, վասն որոյ եւ Միջերկրէ կոչին» (Աշխարհացույց, էջ 21—22: Մատենադարձութիւնը Մովսեսի Խորենացու, Վնենտիկ, 1865, էջ 600):

⁴⁵ Հմմտ. Խորենացի, Ա, ր, էջ 29, Բ, Ժդ, էջ 127, Բ, Ժե, էջ 129, Բ, իե, էջ 142:

⁴⁶ Ammian Marc., XX, 11, 1—32. Բզարդեի պաշարման ժամանակ հռոմեացիներն ու պարսիկները երկուստեք ծանր կորուստներ կրեցին, ուստի Կոստանցիոս կայսրը, երկյուղ կրելով իր գազազած զորքերի ընդվզումից, որոշեց ետ քաշվել Ասորիք և ձմեռել Անտիոքում (Ammian. Marc.): XX, 11, 31—32): Ճակատամարտի այս ելքը լիովին համընկնում է Խորենացու տված զնահատականին. «Իսկ Կոստանդեայ արարեալ կեսար զՅուլիանոս՝ սպառազինեցաւ ընդդէմ Պարսից. և տուեալ ճակատ, երկուքին կողմանքն պարտեցան. քանզի բազումք անկան յերկաթանշիւրոցն. և ոչ մի ի միւսոյ թիկունս դարձայց. մինչև ի հաւանութիւն Յեզեալ՝ արարին խաղաղութիւն ամս սակաւս» (Խորենացի, Գ, Ժբ, էջ 270):

⁴⁷ Ammian Marc., XX, 11, 11. Carrhae, այլ հեղինակների մոտ Carrhae, հայկական աղբյուրներում՝ Խառան—քաղաք Միջագետքում՝ Եդեսիայից հարավ-արևելք (ներկայումս՝ Հարան). այստեղ մ. թ. ա. 53 թ. պարտություն կրեց և սպանվեց հռոմեացի զորավար Նրատոսը պարթևների հետ մղած ճակատամարտում:

Անտիոքի մայրաքաղաք Անտիոքի վրա, որն ըստ երևույթին պետք է վերագրել Շապուհ II-ի կատարած արշավանքին դեպի Միջերկրեայք և Պաղեստին⁴⁸։

Այսպես ուրեմն, Ամմիանոս Մարկելինոսի մոտ պահպանված պատմական փաստը, որ Շապուհ թագավորի օրոք պարսիկները ներխուժել են Բյուսթանիա և Պրոպոնտիա, միանգամայն բավարար է մերժելու համար այն «անհերքելի» ապացույցներից մեկը, որոնց հիման վրա ժխտվում է Մովսես խորենացի անունով պատմագրի գոյությունը V դարում, իսկ նրա հեղինակած «Հայոց պատմությունը» համարվում է VII—IX դդ. ապրած ինչ-որ վանականի հորինվածք։ Եթե խորենացու «Հայոց պատմության» մեջ իրոք փաստերի շփոթություն կա, ապա կարելի է կարծել, թե 325—350 թթ. միջև պարսիկների դեպի Բյուսթանիա կատարած արշավանքն է, որ վերագրվել է 363 թ. պարսկա-հռոմեական պատերազմին, այլ ոչ թե VII դարի սկզբին տեղի ունեցած իրանա-բյուզանդական երկարամյա պատերազմների ժամանակ պարսից խոռոմ զորավարի Քաղկեդոն հասնելու փաստը։ Այդ դեպքում փաստերի շփոթությունը պետք է վերագրել պարզապես V դարի Պատմահայր Մովսես խորենացուն կամ նրա սկզբնաղբյուրին, և ամենևին հարկ չկա Բյուսթանիայի առեղծվածը բացատրելու համար հորինել VII—IX դդ. ապրած ինչ-որ Կեղծ Մովսես։

Բայց խնդիրը միայն Կեղծ Մովսեսը չէ։ Մի ամբողջ շարք նշանավոր գիտնականներ՝ Ա. Գուտշմիդից մինչև Ռ. Թոմսոն, արդեն ավելի քան հարյուր տարի, միահամուռ կրկնում են, թե պարսից զորքը առաջին անգամ Բյուսթանիա է հասել միայն VII դարի սկզբում, մինչդեռ պարզվում է, որ առաջին անգամ դա տեղի է ունեցել IV դարի առաջին կեսին։ Այժմ հարց է ծագում, արդյո՞ք Կոստանդիանոս Մեծի կամ նրա հաջորդ Կոստանցիոս կայսեր օրոք Շապուհի Բյուսթանիա կատարած արշավանքն է, որ խորենացու մոտ կամ նրա աղբյուրում թյուրիմացաբար համատեղվել է Հոբիանոս կայսեր Պարսկաստանից նահանջելու փաստի հետ, թե՞ իրոք, 363 թ. պատերազմի միջոցին ևս պարսից զորքը կրկին հասած է եղել Բյուսթանիա։ խորենացու վկայություններից երևում է, որ Շապուհ II-ը Միջերկրեայքի վրա հարձակվել է երկու անգամ՝ հայոց Տիրան թագավորի (Գ. ԺԲ) և նրա որդի Արշակ II թագավորի օրոք⁴⁹։ խորենացու այն հաղորդումը, որ 363 թ. Պարսկաստանում Հուլիանոսի կրած պարտությունից հետո, Շապուհը Հայաստանի վրա թագավորեցրեց Տիրանի որդի Արշակին և հետապնդելով հունական զորքին, հասավ մինչև Բյուսթանիա (Գ. ԺԷ—ԺԸ), հաստատվում է նաև նրա մեկ այլ տեղեկությամբ՝ թե Հոբիանոս կայսեր հանկարծահաս վախճանից

⁴⁸ Ամմիանոսի «Հռոմեական պատմության» գերմաներեն թարգմանիչ և մեկնաբան Վոլֆգանգ Ջայֆարտը նշում է, որ պարսիկներն Անտիոքը գրավել են երկու անգամ՝ մ. թ. 256 և 260 թթ., թեև ավելացնում է, որ այդ տարեթվերը չի կարելի հավաստի համարել (A. M. I. a. n. Marc., Bd. 2, S. 200, n. 105)։ Այսուամենայնիվ անհնար է կարծել, որ 361 թ. հռոմեացիների ձեռքն ընկած և Բզարդեի պաշարման ժամանակ զործի գրված պարսիկների պարսպակործան խոյր կարող էր կապ ունենալ դրանից 100 տարի առաջ՝ 256 և 260 թթ. Անտիոքի գրավման հետ։ Ուստի շատ ավելի հավանական է պարսիկների կողմից Անտիոքի պաշարումը կապել խորենացու մոտ հիշատակված Շապուհ II-ի արշավանքի հետ դեպի Միջերկրեայք և Պաղեստին։ Գերմանացի հետազոտողին, անկասկած, հայտնի չի եղել խորենացու Պատմության մեջ պահպանված փաստը։

⁴⁹ Հուլիանոսի 363 թ. պարսկական արշավանքը խորենացու մոտ գուզագիպում է հայոց Տիրան թագավորի գահակալության վերջին և նրա որդի Արշակ II-ի գահակալության սկզբին (Գ. ԺԷ, Գ. ԺԸ)։ Պատմաբանները Տիրանի թագավորության վերջին տարին և Արշակ II-ի թագավորության առաջին տարին գնում են 350 թ.՝ Հուլիանոսի պարսկական արշավանքից 13 տարի առաջ։ Բայց այս ժամանակագրական հակասությունը չի խանգարում մեր հետապնդած խնդրին. ավելի կարևոր է մատնանշել, որ խորենացին և բյուզանդական հեղինակները միանգամայն համերաշխ են 363 թ. պարսկա-հռոմեական պատերազմի և դրան հաջորդող անցքերի հետ առնչվող հռոմեական կայսրերի ժամանակակցության հարցում, որ սերտ կապ ունի քննարկվող նյութի հետ։

հետո նոր կայսր հռչակված Վաղենտինիանոսը (ճիշտը՝ Վաղենտինիանոս) գումարտակ է ուղարկում Միջերկրեայք և հալածում պարսից զորքը. «Եւ Յունաց թագաւորեալ Վաղենտինիանոս, և գումարտակ ի Միջերկրեայս առաքեալ՝ հալածականս առնէ զզօրս Պարսից»⁵⁰:

Այստեղ ևս Բյութանիան հանդիպադրվում է Միջերկրայքին. թվում է, թե այս կողմից ևս արդարանում է Խորենացու հաղորդածը, որ Շապուհի զորքն, իսկապես, կրկին հասած է եղել Բյութանիա, այսինքն՝ Միջերկրայք և Վաղենտինիանոսը հալածեց նրանց Միջերկրայքից: Բայց խնդիրն այն է, որ նման կարծիքը հակասում է ոչ միայն պատմական իրողությանը, այլև Խորենացու աշխարհագրական րմբռնումներին:

Իրոք, եթե 363 թ. պատերազմի ժամանակ էլ պարսիկները կրկին հասել էին պոնտական Բյութանիա, ապա ինչո՞ւ ո՛չ այդ անցքերին ժամանակակից հռոմեացի և ո՛չ էլ հետագա բյուզանդական հեղինակների երկերում հիշատակություն չկա այդ մասին: Ամմիանոսը վկայում է միայն, որ 364 թ. ամբողջ հռոմեական աշխարհը ենթարկվեց բարբարոս ցեղերի ներխուժման. «Այդ ժամանակ գրեթե ամբողջ Հռոմեական աշխարհով մեկ հնչում էին ռազմի կոչող շեփոռներ. ամենավայրագ ցեղերը խուժում էին հարևան (երկրների) սահմանները: Նույն միջոցին ալամաններն ամայացնում էին Գալլիան և Ռետիան, իսկ սարմատներն ու քվարները՝ Պանոնիան. պիկտերն ու սաքսերը, սկոտներն ու ատատկոտները մշտական շարիքներով պատուհասում էին բրիտանացիներին. ավստորիացիները և մյուս մավր ցեղերը սովորականից ավելի կատաղի ասպատակում էին Աֆրիկան, իսկ Թրակիան կողոպտում էին գոթերի հրոսակախմբերը:

Պարսից թագավորը ձեռքը երկարեց Հայաստանին և կրկին սպառնում էր ահռելի զորություններ, բայց և առանց իրավունքի, այն իր իշխանության տակ առնել: Պատճառաբանելով, թե Հոբեանոսի վախճանից հետո, որի հետ նա խաղաղության դաշինք էր կնքել, ոչինչ չի կարող իրեն արգելել սեփականելու այդ երկիրը, որը, նրա ասելով, առաջ պատկանելիս է եղել իր նախնիներին»⁵¹:

Բայց Ամմիանոսի մոտ ոչ մի ակնարկ չկա այն մասին, թե 364 թ. Շապուհի զորքը ներխուժած, առավել ևս, երկար ամիսներ գրաված է եղել Բյութանիայի ծովափնյա տարածքը, որն այդ ժամանակ գտնվում էր ինքնակոչ կայսր, ապստամբ Պրոկոպիոսի իշխանության տակ⁵²: Մյուս կողմից, ուշադիր բաղդատումը երևան է հանում Խորենացու Բյութանիայի և Փոքր Ասիայում գտնվող պոնտական Բյութանիայի միջև եղած տարբերությունը՝ ըստ Աշխարհացույցի պոնտական Բյութանիան մի ամբողջ ծովափնյա պրովինցիա է կամ երկրամաս, որտեղ գտնվում էր Նիկիա քաղաքը: Եվ Խորենացուն քաջ հայտնի է այդ Բյութանիան, քանզի նա գիտե, որ Բյութանիայի Նիկիա քաղաքում Կոստանդինոս Մեծը հրավիրել էր եկեղեցական առաջին տիեզերական ժողովը. «Վասն որոյ ել հրաման յինքնակալէն Կոստանդինոսէ՝ ժողով լինել բազմութեան եպիսկոպոսաց ի Նիկիա Բիւթանացւոց»⁵³:

Դրան հակառակ, Խորենացու Գ. ԺԹ գլխում հիշատակված Բյութանիան, ինչպես պետք է կարծել, մի բնակավայր է, ամրացված ծովափնյա քաղաք, որ պաշարել էր Շապուհ II-ը:

Սրա հետ մեկտեղ, Խորենացու Պատմության մեջ Միջերկրեայք (նաև Միջերկրայք, Մէջերկրեայք, Մէջերկրայք) գործածված է մեկ տասնյակ անգամ, և դատելով շարադրանքից, ունի աշխարհագրական միանգամայն այլ ընդգրկում⁵⁴, քան VII դարի Աշխարհացույցի վերը բերված նկարագրությունը:

⁵⁰ Խորենացի, Գ, ԺԹ, էջ 277—278:

⁵¹ Ammianus Marcellinus, XXVI. 5—6

⁵² Նույն տեղում, XXVI. 8, 7.

⁵³ Խորենացի, Բ. ձԹ, էջ 239:

⁵⁴ Վիստոն եղբայրները Միջերկրայք չամենուրեք լատիներեն բառացի թարգ-

Հալերեն Միջերկրայի պատճենումն է հունարեն Μεσογεία, Μεσογεία և լատիներեն Mediterraena բառերի, որոնք սկզբնապես գործածվում էին իբրև հասարակ գոյական՝ «նեբրին երկիր, երկրի նեբրին մասը» իմաստով⁵⁵, ճիշտ այնպես, ինչպես Փավստոս Բուզանդի մոտ՝ Միջնաշխարհ, Մեջ-աշխարհ: Մ. թ. III դարից Հունական ծովը լատին աղբյուրներում սկսեցին անվանել Mare Mediterraneum⁵⁶—Միջերկրական ծով:

Ինչպես ասվեց, Աշխարհացույցում Միջերկրայքը Անատոլիա կամ Ասիա թերակղզին է. «Ընդ մէջ Յունաց ծովուն եւ Պոնտոսի», որի ավելի հին ձևա-կերպումը գտնում ենք խորենացու մոտ—«զմիջոց երկուց ծովուց մեծամեծաց, զՊոնտուն և զՈվկիանու» (երկու մեծամեծ ծովերի՝ Պոնտոսի և Օվկիա-նոսի միջակա տարածքը)⁵⁷:

Բայց հակառակ Աշխարհացույցի խորենացին Միջերկրայի անվան տակ նկատի ունի ոչ միայն Անատոլիա թերակղզին, այլ նաև Ասորիքը⁵⁸, այսինքն՝ Միջերկրական ծովի արևելյան ափը մինչև Պաղեստին: Մեզ անհրա-ժեշտ է հավաստի վկայություններով հաստատել աշխարհագրական այս նոր իրողությունը, որ տարբեր է Աշխարհացույցի ունեցած պատկերացումից:

Խորենացին հաղորդում է, որ Հռոմեական կայսրն ամբողջ Միջերկրեայ-քը վստահեց Հրեաստանի Հերովդես թագավորին, որն էլ Միջերկրեայքի թա-գավոր կարգեց իր որդի Աղեքսանդրի աներոջը⁵⁹. «Իսկ կայսրն ոչ միայն ՂԱրշամ շահատէ յիշխանութենէն Հերովդի, այլ և զամենայն Միջերկրեայս նմա հաստատյ: Յայնմ ժամանակի Հերովդէս զանեւ Աղեքսանդրի որդւոյ իւ-րոյ [...] ընդ իւրով ձեռամբ թագաւոր Միջերկրեայցն կացուցանէր, առեալ իւր ի սպասաւորութիւն գունդ ի Գաղատացւոց և ի Պոնտացւոց»⁶⁰:

Պարզ է, որ այստեղ ևս Միջերկրեայքը չի կարող ընդգրկել սոսկ Անա-տոլիա թերակղզին, քանի որ Հռոմի կայսրը չէր կարող Հրեաստանի Հերովդ-եսն թագավորին հանձնել Անատոլիան՝ զանց առնելով նրանց միջև ընկած Ասորիքը: Դրա հաստատումը գտնում ենք եբրայեցի պատմագիր Հովսեփոս Փլաբիոսի պատմական երկերում, որոնցից, ինչպես ցույց է տալիս բնագրե-րի բաղդատումը, խորենացին քաղել է վերոհիշյալ տեղեկությունը: Հով-

մաննի են Mediterraena. Ռ. Թոմսոնը Խորենացու անգլերեն թարգմանության մեջ Միջ-երկրեայք ներկայացնում է տարբեր տերմիններով—Anatolia (Ա. ը. Բ, ին երկու անգամ Գ, ԺԹ), Asia minor (Բ, ԺԵ), Mediterranean regions (Բ. կգ երկու անգամ), Mediterranean, Mediterranean Lands (Գ, ԺԲ):

⁵⁵ Այդ նշանակությամբ էլ Μεσογεία գործածում է Ստրաբոնը՝ Geographica, II, 5, 31; XII, 1, 3:

⁵⁶ C. Julii Solini Collectanea rerum memorabilium iterum recensuit, Berolina 1895 (22, 18). Ենթադրվում է, որ Հովիոս Սոլինուսը II կամ ոչ ուշ քան III դարի հեթա-նոս իսպանացի հեղինակ է, որի աշխատության հատվածները պահպանվել են նշանավոր մատենագիր, Սեվիլիայի եպիսկոպոս Իսիդոր Իսպանացու (570—636) 20 հատորանոց հանրա-դիտարանում՝ Isidorus Hispalensis. Originum seu Etymologiarum libri XX (13, 16) (Corpus grammaticorum, Leipzig, 1833):

⁵⁷ Խորենացի, Ա, Ժգ, էջ 46. Ովկիանոս=Յունաց ծով—Միջերկրական ծովի հնադույն անուններն են հայ մատենագրության մեջ:

⁵⁸ Ասորիք—ըստ Աշխարհացույցի ընդհանուր Ասիայի 23-րդ աշխարհը, որ ձգվում է հա-մանուն Ասորական ծովի արևելյան ափով՝ Կիլիկիայի դոներից (Հյուսիսում) մինչև Հրեաստան (հարավում), իսկ արևելքից հասնում է մինչև Եփրատի շրջադարձը (էջ 35): Միջերկրական ծովի արևելյան կողմը, որ հարում է Ասորիքին, Ստրաբոնն անվանում է Ասորական ծով:

⁵⁹ Ըստ Հովսեփոս Փլաբիոսի Աղեքսանդրի ամուսնացած էր Կապադոկիայի թագավոր Արքեղայոսի դստեր՝ Գլափյուլայի հետ—Flavius Josephus Antiquitatum judaicarum. Pa-riſiis, 1915 (XVI 8, 6); Idem: De Bello judaico. Parisiis, 1847 (I. 25. 6). Հովսեփոս Փլավիոս, Թարգմանություն բնագրից Ս. Մ. Կրկյաշարյանի. Երևան, 1976, էջ 42:

⁶⁰ Խորենացի, Բ, իե, էջ 142:

սեպուսը վկայում է, որ Օգոստոս Կեսարը⁶¹ Հերովդեսին պարգևեց Ջենոդորոս իշխանից խլած Տրաքոն (Trachon, Trachonitis) երկիրը, որ ավազակ-ները Ջենոդորոսի թողնվածությամբ դարձրել էին իրենց հանգրվան՝ հարևան դամասկացիների գավառն ասպատակելու համար⁶², իսկ Ջենոդորոսի մահից հետո Կեսարը Հերովդեսին պարգևեց նաև Ջենոդորոսին պատկանող այն տարածքը, որ գտնվում էր Տրաքոնի և Գալիլեայի միջև ներառյալ Ուլաթա, Պանիաղա⁶³ և դրանց սահմանակից գավառները, իսկ Հերովդեսին կարգեց ամբողջ Ասորիքի հոգաբարձու (totius Syriae Herodem procuratorem consti-tuit) և նրա իշխանությանը ենթարկեց Ասորիքի կառավարիչներին, որոնց նա հանձնարարեց միայն Հերովդեսի խորհրդով կառավարել երկիրը⁶⁴։ Այստեղից պարզվում է, որ հենց Հովսեպոսի այս հաղորդումն աչքի առաջ ունի Խորենացին, ասելով, թե կայսրը Հերովդեսին վստահեց ամբողջ Միջերկրային Վերին Միջերկրեայի նմա հավատա՝ համար. «Ջնա ամենայն ասորւոց հոգաբարձու կացոյց»։ Որից և երևում է, որ Խորենացին Միջերկրեայի⁶⁵ անվան տակ հասկանում է նաև Ասորիքը։

⁶¹ Հռոմ. ընդգրկում՝ Kxi:323:5. Լատ.՝ Caesar. Խորենացու մոտ (Բ, ԻԵ)՝ կայսր (առանց անունը հիշատակելու) — խոսքը հռոմեական կայսր Օկտավիանոս Օգոստոսի մասին է (մ. թ. ա. 42—մ. թ. 14)։

⁶² Flavii Josephi Antiquitatum judaicarum XV. 16, 1; Idem: De Bello judaico. . 20 (15). 4.

⁶³ Հսա Աշխարհացույցի Պանիաղան գտնվում էր Ասորիքում, որտեղ բխում էին Հորդանան գետի աղբյուրները. «Յորդանան որ ելեալ ի Պանիաղայ՝ մտանէ ի Գալիլեացւոց ծովն» (Աշխարհացույց, էջ 36)։ Հովսեպոսի տեղեկանում ենք, թե Հերովդես թագավորը ի նշան երախտագիտության մի շքեղ տաճար կառուցեց Կեսարի պատվին Ջենոդորոսի երկրում՝ Պանիոն կոչված վայրում, որտեղ լեռան տակից բխում էին Հորդանան գետի աղբյուրները (Flavii Josephi Antiquitatum judaicarum XV. 10, 3)։

⁶⁴ Flavii Josephi De bello judaico, I. 20 (15), 4 — հայերեն թարգմանությունը Լա. տիներենից Ատեփանեսոս Լեհացու (1660 թ.). «Կայսր [...] գնա [Հերովդէս] ամենայն տարւոց հոգաբարձու կացոյց։ Եւ իբրեւ միաւնգամ դարձաւ ի գաւառն այն կայսր տասներորդ յամի թողաւորութեան, պատուէր լիտ գործակալաց հոռվմայեցւոց, զի մի՛ ինչ առանց խորհրդոյ Հերովդի համարձակեցին առնել. և ետ մահուան Ջենոդորոսի զամենայն երկիրն որ է ի մէջ տրաքոնացւոց և գալիլեացւոց ի նա հաւատացա՝ (Պատմագիրք արարեալ Յովսեպոսի երբալցւոյ յաղագս պատերազմին Հրէից ընդ Հռոմայեցիս և աւերմանն Երուսաղէմի և Տաճարին շնոյ (Ա, 36), էջմիածին, 1787, էջ 75)։ Հմմտ. նաև Flavii Josephi Antiquitatum judaicarum: XV. 10, 3 — հայերեն թարգմանությունը Խաչերենից Ա. Տայիսիմոնյանի (1760—61)։

«Այլ Սենոդորոս վայթմամբ որովայնին, և հեղմամբ բաղում արեան մեռաւ յԱնտիոք Ասորեստանայց և շնորհաց կայսրն Հերովդի զմեծ մասն յընչից նորա, որ էր ի մէջ տրոգոնացւոց, և Գալիլեայ. այսինքն զՈւլաղա և զԲանեհոգա և զերկիրն շուրջանակի։ Եւ Լթող գնա գնալ, և հրամանաց դատաւորացն Ասորւոց, զի խորհրդովն նորա արասցեն զկառավարութիւն» (Գիրք մատենի Հնագոյն Պատմութեանց, Շարագրեալ և արարեալ ի Յովսեպոսէ Փլափիանոսէ Երբայեցւոյ, յԱմէնիմաստ Պատմչէ (գիրք ԺԵ, գլ, Ժգ) տե՛ս Մատոցի անվան Մատենադարան, ձեռ. № 2747, էջ 566)։

⁶⁵ Հովսեպոս Փլաբիոսին հայտնի չէ Միջերկրեայ իբրեւ որոշակի աշխարհագրական տարածքի հատուկ անուն։ Նրա «Պատերազմ Հրէից» գրքում Μεջογεια (միջերկրեայ) հանդիպում է միայն բառի սկզբնական՝ «երկրի ներքին մասը» նշանակությամբ (տե՛ս մեր 220 էջը և 53 ծանոթագրությունը)։ «Այլև զմիջերկրեայ քաղաքսն՝ որք ո՛չ էին կործանեալ, յիշխանութենէն Հրէից ազատեաց (Պոմպեոս—Ա. Մ.). զՀիպպոն, զՍկիթագոլիս, «Պեղա, զՍամարիա, զՄարիսա, զԱղուտոս, զԵմանի, և զԱրևթուս։ Նա՛ն զԺովեզերեայս՝ զԳաղա, զՅոպպէ, զԴոփրա, և զԱշտարակն Ստրատոնեան, որ յետոյ երևելի շինուածովք հրաշակերտեալ ի Հերովդէէ արքայէն, Կեսարիա՝ անուանեցաւ. զայս ամենայն քաղաքս յիրանց բնակիչսն դարձուցեալ ընդ գաւազանաւ Ասորւոց Կացոյց (Յովսեպոս՝ Յաղագս պատերազմին Հրէից, Վաղարշապատ, 1787, Ա, և, էջ 34)։ Այստեղ Հովսեպոսը Միջերկրեայս անվան տակ նկատի ունի Հրեաստանի ներքին մասը, որը հակադրում է Ժովեզերին, իսկ զա ցւոյց է

Չնայած Պաղեստինը նույնպես գտնվում էր Միջերկրական ծովի արևմտյան ափին և հյուսիսից սահմանակից էր Ասորիքին, բայց և այնպես խորենացին Պաղեստինը պարզորոշ սահմանազատում է Միջերկրեայքից: Դա ակնհայտ երևում է Պատմահոր այն խոսքից, թե՛ «Եւ զայլ յոլով թագաւորս նուաճեալ Շապհոյ, և զազաւ բարբարոսաց բազումս ի սատարութիւն կալեալ՝ յարձակեցաւ ի Միջերկրեայս և ի Պաղեստինէ»⁶⁶:

Վերոհիշյալից բխող կարևոր հետևությունն այն է, որ երբ խորենացին ասում է, թե Վաղենտինիանոսը զորքի գումարտակ ուղարկեց Միջերկրեայք՝ պարսկական զորքը հալածելու, ապա դա մտածել է տալիս, որ Պատմահայրը այդ անվան տակ Անատոլիայի հետ միասին նկատի ունի և Ասորիքը: Մեր այս եզրակացությունը լիովին հաստատվում է VI դարի հեղինակ Մալալայի հունարեն ժամանակագրության տվյալներով: Մալալան հաղորդում է. «Վաղենտինիանոս կայսրը բազում զորքեր ձեռնարկեց Ավագ Անտիոքում: Նա պատերազմ սկսեց պարսիկների դեմ, (նրանց վրա) ուղարկելով իր Վազես եղբորը, որին կեսար էր նշանակել ապրիլ ամսի 1-ին: Բայց Վաղեսը ճակատամարտ չտվեց, այլ տեղ հասնելուն պես ձեռնարկեց խաղաղության դաշինքի, քանի որ անձամբ եղբոր կողմից լիազորություն էր ստացել դրա համար, եթե այստեղ հասած պարսիկները հաշտություն խնդրեին»:

Այսպես, Վաղեսն այս զորքի բազմություն հետ նույնմբեր ամսի 10-ին, ինդիկտոնի 14-րդ տարում Ասորիքի Անտիոք հասնելով, այնտեղ սկսեց բանակցել պարսիկների հետ խաղաղության պայմանագրի մասին և պայմանագիր կնքեց յոթ տարով, քանի որ պարսիկները հաշտություն խնդրեցին և նահանջեցին մինչև Մծբինի կեսը»⁶⁷:

Ի մի բերելով խորենացու և Մալալայի հաղորդած տվյալները, համոզվում ենք, որ դրանք վերաբերում են միևնույն պատմական դեպքին:

ա) Երկու հեղինակների մոտ էլ Վաղենտինիանոսը 364 թ. թագավոր դառնալուց հետո, զորք է ուղարկում պարսիկների դեմ: Մալալայի *Χρονικὴ Περσικῆ* արտահայտությունն այլ բան չ' նշանակում, քանի որ պարսիկները մինչ այդ արդեն իջել էին Անտիոք:

բ) խորենացու Միջերկրեայքը դարձյալ հանդիպադրվում է Ասորիք անվանը⁶⁸:

գ) Երկուսի մոտ էլ հռոմեացիները ետ են վանում պարսկական զորքը, Մալալան ավելի որոշակի է ասում՝ պարսիկները նահանջեցին մինչև Մծբին:

Իսկ թե պարսիկներն ինչու համաձայնեցին առանց ճակատամարտի հեռանալ Ասորիքից, դրա բացատրությունը գտնում ենք խորենացու մոտ՝ այդ ընթացքում հյուսիսային ազգերը խռովություն բարձրացրին Շապուհ արքայի դեմ. իսկ Վաղենտինիանոսը, հույների վրա թագավորելով, օգտվեց նրանից, որ Շապուհը զրադված է հյուսիսային ազգերի դեմ կռվելով, մի գումարտակ ուղարկեց Ասորիք և հալածեց այնտեղից պարսկական զորքը⁶⁹:

Համաման տեղեկություններ հաղորդում են նաև V դարի առաջին կեսի եկեղեցական պատմիչներ Սոկրատ Սքուաստիկոսը և Սոզոմենոսը, որոնք

տալիս, որ մ. թ. 1 դարում Միջերկրական ծովի առափնյա երկրները Միջերկրեայք չէին կոչվում:

⁶⁶ Խորենացի, Գ, Ժր, էջ 270:

⁶⁷ I. Iohannis Malalae Chronographia. Liber XIII, p. 338 (Migne, Patrologiae graecae. Tomus 97, col. 504, 505):

⁶⁸ Գր. Խալաթյանցը փորձում է ապացուցել, թե այստեղ ևս խորենացու հաղորդումը պատմական հիմք չունի, մատնանշելով, թե իբր Սոկրատը և Մալալան խոսում են միայն խաղաղության պայմանագիր նորոգելու, այլ ոչ պարսից դեմ պատերազմելու և նրանց պարտության մասին: (Г. Халатъянц. Армянские Аршакиды, с. 237). Խորենացու և Մալալայի այս համարժեք տեղեկություններն արդյունք են ոչ թե այն բանի, որ խորենացին որպես «ուշ շրջանի հեղինակ» օգտվել է Մալալայից, այլ այդ երկու հեղինակները օգտվել են այնպիսի սկզբնաղբյուրներից, որոնք պարունակել են միանման տեղեկություններ:

⁶⁹ Խորենացի, Գ, ԺԲ, էջ 278:

նույնպես վկայում են, որ Վաղեսի Անտիոք գնալը, իրոք, կապված է եղել պարսիկների նոր հարձակման սպառնալիքի հետ: Սոկրատի «Եկեղեցական պատմութիւն» մեջ կարդում ենք. «Վաղեսն անհապաղ Ասորիքի Անտիոք (քաղաքը) մեկնեց, երկյուղ կրելով, թե միգուցե պարսիկները Հորիանոսի հետ կնքած Երեսնամյա դաշինքը լուծելով՝ ներխուժեն հռոմեական սահմանները, բայց պարսիկները լուռ էին, իսկ նա խաղաղության հանդիպելով, համագոյակների (ուղղափառների—Ա. Մ.) դեմ պիղծ պատերազմ սկսեց»⁷⁰:

Նույն առիթով Սոզոմենոսը հաղորդում է. «Այնուհետև (Վաղես կայսրը) իջավ Ասորիք. երկյուղ ուներ, թե չլինի պարսիկները լուծեն Հորիանոսի հետ կնքած Երեսնամյա դաշինքը: Ուստի նրանց նոր ոտնձգությունների (դեմն տոնելու) համար, բանակ դրեց Անտիոքում»⁷¹:

Ինչպես տեսնում ենք, երեք բյուզանդական հեղինակներն էլ՝ Սոկրատը, Սոզոմենոսը և Մալալան կայսր կսւմ կեսար Վաղեսի Ասորոց Անտիոք գնալը կապում են միմյան պարսիկների հարձակման սպառնալիքի հետ, որից և միանշանակ կարելի է եղրակացնել, թե 364 թ. պարսից զորքը կանգնած է եղել Ասորքում՝ Անտիոքի մոտերքում:

Ասորիքից, կարող ենք ասել, որ Խորենացին և բյուզանդական հեղինակները փոխադարձաբար հաստատում և լրացնում են միմյանց՝ Վաղեսն տիրանոս կայսրը, պատերազմ հայտարարելով պարսիկներին, իր եղբայր Վաղեսին ուղարկեց նրանց դեմ՝ Ասորիքի Անտիոք քաղաքը, բայց զործը ճակատամարտի չհասավ, քանի որ հյուսիսային ցեղերի բարձրացրած խռովություն պատճառով, պարսիկները համաձայնեցին չեղյալ համարել Հորիանոսին պարտադրած «Երեսնամյա դաշինքը» և Վաղեսի հետ կնքեցին նոր յոթնամյա պայմանագիր: Ահա թե ինչու պարսիկները ստիպված եղան հրաժարվել իրենց նվաճած տարածքների մի մասից և Ասորիքի Անտիոք քաղաքից նահանջեցին մինչև Մծրին: Դա նույն Ավագ Անտիոքն է, որ գտնվում է Որոնտես գետի ափին⁷²: Միջերկրական ծովի առափնյա տարածքում⁷³: Այստեղ էլ, Միջերկրյա Ասորիքում, ցույց է տալիս Խորենացին պարսից զորքի գտնված վայրը, որտեղից Վաղեսն տիրանոսի ուղարկած հռոմեական զորամարտակը հալածեց նրանց:

⁷⁰ Socratis Scholastici Historia ecclesiastica' IV, 2 (Migne, t. 67, col. 455).

Սոկրատայ Սքոլաստիկոսի Եկեղեցական պատմութիւն. Վաղարշապատ, 1897, գիրք չորրորդ, դ. Բ, էջ 297, 298՝ «Իսկ Վաղէս վաղվաղակի յԱնտիոքայ Ասորոց գնացեալ, կասկածեալ զի մի Պարսիցն զեղեալն դաշինս երեսուն ամի առ Յորիանոսիւ լուծեալ ի Հոովմայեցոցն ելցեն յաշխարհ ալ Պարսկական լռէր: Իսկ նորա խաղաղութեանն հպեալ, համագոյութեանն խորհողաց զանուէրն յարոյց պատերազմ: Սոկրատի միտքն այն է, թե արիոսական աղանդով վարակված Վաղեսն այս խաղաղությունից օգտվելով՝ պատերազմ սկսեց ուղղափառ եպիսկոպոսների դեմ:

⁷¹ Hermiae Sozomeni Ecclesiastica historia, VI, 7 (Migne. Patrologiae graecae, t. 67, col. 1113, p. 228).

⁷² Τῶν περὶ Ὀρροντιῶν Ἀντισχεῖσιν (Sozom—VII, 13). Որոնտես գետի ափումը Աշխարհացուցում աղավաղված է. «զՈւէնտիս, որ բղխէ ի Լիրանանէ, անցանելով առ Եպիփանով, մտանէ ի ծով՝ հուպ յԱւագն Անտիոք» (էջ 36): Քաղաքն Ավագ Անտիոք էր կոչվում Պրիդիայի և մյուս Անտիոքներից զանազանելու համար:

⁷³ Ասորիքի այդ մասը հույն աշխարհագետ Ստրաբոնն անվանում է Սելեկիս (Σελευς) և հարապոլիս (բառաբաղաբ)՝ այն նշանավոր չորս քաղաքներից, որ հիմնել էր Սելեկոս Նիկատորը (մ. թ. ա. 358—280) և կոչել հոր, իր, կնոջ և մոր անուններով՝ Անտիոք (Դափնեի մոտ), Սելեկիա, Ապամեա, Լաոդիկեա (Լաոդիկէ) (XVI, 2, 4): Աշխարհացուցը հիշատակում է Սելեկիան որպես Ասորիքի ինը աշխարհներից մեկը՝ «Ավագ Անտիոք իւր զատուցեալ աշխարհաւն, որ կոչի Սելեկիա» (էջ 35): Հիերոկլեսի «Սիսեկղեմոս»-ում Ասորիք առաջին նահանգի մեջ (Ἡμερῶν τῆς Συρίας) մտնում էին հետևյալ քաղաքները՝ Անտիոք(իս) (Դափնեի մոտ), Լաոդիկեա, Գարալա, Պալտոս, Բերոսիա, Խալկիսս (Hieroclis Synecdemus, Lipsiae, 1893, p. 39):

Արդեն իսկ աշխարհագրական այս նոր իրողությունը մտածել է տալիս, որ խորհնացու Պատմության մեջ 363 թ. պարսկա-հռոմեական պատերազմի կապակցությամբ խոսք չի կարող լինել Շապուհի Բյութանիա հասնելու մասին: Եվ իրոք, եթե Շապուհի զորքը հասած լիներ Բյութանիա, ապա պարսից զորքը պետք է կանգնած լիներ Եվքսինյան Բոսփորի ափին, այլ ոչ թե Միջերկրական ծովի:

Խորհնացու Բյութանիան պետք է որոնել ոչ թե այնտեղ, ուր մատնացույց են անում նրա ընդդիմախոսները, այլ Միջերկրական ծովի ափին:

Մեր հետազա քննությունը ցույց տվեց, որ այս դեպքում ևս իրավացին Պատմահայրն է. պարզվում է, որ մեր թվարկության առաջին դարերում Ասորիքում, Անտիոք քաղաքից ոչ հեռու, Միջերկրական ծովի ափին գոյություն ունեւր մի հռոմեական զորակայան և նավահանգիստ—այն կոչվում էր Բիթլիա կամ Բիթյուլիա, որ գրեթե նույնահնչուն է Բյութանիա անվանը, մանավանդ եթե նկատի ունենանք վերջինիս հունարեն՝ Βιθυνία և լատիններեն՝ Bithynia (Բիթյունիա) ձևը: Մեր կարծիքով խորհնացու Պատմության մեջ սկզբնապես եղել է հենց Բիթյուլիա, որ արտագրող գրիչները համարել են ձեռագրական աղավաղում և տուղելա են ծանոթ ձևով՝ Բիթյունիա (որն էլ հետագայում դարձել է Բյութանիա) և այսպիսով խորհնացու Բիթլիան Միջերկրականի ափից տեղափոխվել է Եվքսինյան Բոսփորի ափը:

Այս անհայտ Բիթլիա քաղաքի և նրա տեղադրման մասին տեղեկություն է տալիս Դոմինիոս (կամ Դոմինոս) ժամանակագիրը⁷⁴ Հռոմի կայսր Տրայանոսի (98—117) և պարսից Սանատրուկ թագավորի միջև տեղի ունեցած պատերազմի առիթով: Ուրեմն Դոմինիոսի հաղորդած տեղեկությունը Բիթլիայի մասին վերաբերում է մ. թ. II դարի սկզբին՝ Վեսպասիանոս թագավոր Սանատրուկ(իոս)ը ձգտում էր ավերել հռոմեացիների երկիրը: Հայոց թագավոր Օսորոսը⁷⁵ Մեծերդասի (Միհրդատ) եղբայրը վերջինիս մահվան լուրն առնելով, իր հարազատ որդուն՝ Պարթամասպատին բուն Հայաստանից մեծ զորքով անմիջապես ուղարկեց հռոմեացիների դեմ, իր հորեղորոր որդուն՝ պարսից թագավոր Սանատրուկիոսին օգնելու: Այս լսելով, աստվածային Տրայանոս կայսրն անմիջապես պատերազմի պատրաստվեց և իր թագավորության տասներկուերորդ տարվա (մ. թ. 110 թ.—Ա. Մ.) հոկտեմբերին ելնելով Հռոմից՝ նախ նավելով հասավ Անատոլիա (արևելք), ապա զորքի մեծ բազմությամբ... դեկտեմբերին ճեպանավերով ժամանեց Ասորիքի Մեկեկիա՝ խարիսխ ձգելով Բիթլիա⁷⁶ կռված խառնակայանում, որն

⁷⁴ Դոմինիոսի «Ժամանակագրությունը» սկզբնաղբյուր է ծառայել Մալալայի համար. ուրեմն նա շատ ավելի հին է և ժամանակով ավելի մոտ է կանգնած իր նկարագրած պատմական դեպքերին, քան VI դարի հեղինակ Մալալան, որն իր «Ժամանակագրության» մեջ բազմիցս հիշատակում է Դոմ(ն)ինոսին:

⁷⁵ Օսորոս—Դիոն Կասիոսի մոտ՝ (LXVIII, 19.4) Օսորոս—Խոսրով, հակառակ Մալալայի, համարվում է պարթևների թագավոր (110—130), Բակուր II-ի հաջորդը (Հ. Մանանդյան. Քննական տեսություն հայ ժողովրդի պատմության. հ. Բ, մասն Ա, Երևան 1957, էջ 20): Ակադ. Հ. Մանանդյանը Մալալայի տեղեկությունները համարելով խառնաշփոթ, նշված դեպքերի առիթով եզրակացնում է. «Եւուտով Տրայանոսի թիկունքում սկսվեցին ապստամբություններ և՛ Ադիաբենում, և՛ Միշագետում, և՛ Հայաստանում: Հռոմեական պահպան զորքերը շատ տեղերում կամ շարվեցին և կամ վտարվեցին: Ապստամբության զուլիս էր կանգնել պարթևական թագի թեկնածուներից մեկը, Միհրդատ Զ-ը, որը Խոսրով թագավորի եղբայրն էր: Սա վերագրվեց ամբողջ Միշագետքը և արշավեց մինչև Կոմագեն, սակայն այս արշավանքի ժամանակ ձիուց վայր ընկավ և մեռավ (116 թվին): Միհրդատ Զ-ին հաջորդեց իր որդին՝ Սանատրուկը, որին օգնության հասավ Հայաստանից ուղարկված զորքը Խոսրովի որդու՝ Պարթամասպատի առաջնորդությամբ» (Հ. Մանանդյան. նշվ. աշխ., էջ 29. տե՛ս նաև Հայ ժողովրդի պատմություն. հ. I, Երևան, 1971, էջ 775):

⁷⁶ Մոտ 830 թ. Հիերոկլեսի կազմած «Միշեկդեսոս» կոչված գավառացանկում գրեթե մեք Բιτιύλη (Բիտյուլի), իսկ Գեորգ Կիպրացու մոտ (VII գլուխ)՝ Βιτιύλιος (Բիտյուլիոս)

իսկական բնական նավահանգիստ է Ասորիքի Սելևկիայի մոտ (από τῶν ἰεγομένων Βυττανίων ἐπαχτηρίων, οὗτος αὐτοφύκτος λιμὲνος πλησίον Σελεύκειας τῆς Συρίας).

Իսլից նախքան կայսրը տեղ կհասնեն, պարսիկները գրավելով Ավագ Անտիոքը, այն հայտարարեցին իրենց թագավորինը և տեր դարձան նրան ոչ թե պատերազմով, այլ փոխադարձ համաձայնությամբ⁷⁷:

Բերլած հատվածից հեշտ է տեսնել, որ Տրայանոս կայսեր և Սանառուկ թագավորի օրոք հռոմեացիների և պարսիկների միջև պատերազմական դործողությունները տեղի են ունեցել աշխարհագրական նույն շրջանում, ինչ որ վտղենտինյանոսի և Շապուհ II-ի ժամանակ՝ Ավագ Անտիոք-Սելևկիա-Բիթլիա (Բյութանիա)⁷⁸:

Փայսաոսի և Մալալայի վկայություններից արդեն տեսանք (էջ 213), որ պարսիկները 363 թ. տիրեցին ամբողջ Ասորական Միջագետքին, ուստի միանգամայն տրամաբանական է կարծել, որ դրանից հետո նրանք անցան Եփրատ դեպք⁷⁹ և սպառնացին Ասորիքի Անտիոք քաղաքին ու ծովափնյա Բիթլիա նավահանգստին: Այնպես որ հորենացու տեղեկությունը լիովին համընկնում է հույն հեղինակների հաղորդածին՝ այն տարբերությամբ միայն, որ Սոկրատ, Սոդոմենոսը և Մալալան պարսից զորքի գտնված վայրը Ասորիքում հիշատակում են Անտիոք քաղաքի, իսկ հորենացին՝ Անտիոքին հարևան ծովափնյա Բիթլիայի անունով:

Դոմնինոսի և հորենացու հիշատակած քաղաքների նույնությունը հաստատվում է ոչ միայն անունների նմանաձայնությամբ, այլև նրանով, որ դրանք երկուսն էլ գտնվելիս են եղել հենց ծովափին:

Հորենացու այն արտահայտությունը, թե «(Շապուհ) հասնալ ի Բիթանիա, և նստէր ամիսս յորովս: Եւ ոչ ինչ կարացեալ առնել», այժմ ավելի պարզ ու հասկանալի իմաստ է ստանում. Շապուհ II-ը երկար ամիսներ պաշարում է Բիթլիան, Դոմնինոսի վկայությամբ հռոմեացիների այդ իսկական բնական նավահանգիստն ու խարսխակայանը (մեզ ծանոթ Բյութանիան մի ամբողջ երկրամաս է, որ հնարավոր չէր պաշարել), բայց չկարո-

քազարը, որը թեև նմանահնչուն է մեր ցույց տված Բիթլիային, բայց գտնվում է Ասորիքի Պաղեստին եպարքիայում՝ Գադա և այլ բաղաբների հետ միասին (Hieroclis Synecdemos Lipsiae, 1893, p. 41. Georgii Cyprii Descriptio Romani. Lipsiae, 1890, p. 52). Այդ նույն բազարի անունը հիշատակում է և Սոդոմենոսը Շելեզեցական պատմության մեջ, գարձայր Գադայի շրջանում Βυττανίον (Bottani) աղավաղված ձևով (Hermiae Sosomeni Historia ecclesiastica, Lib. VII, cap. 28, p. 321—Migne, t. 28, col. 1505), որը գրքի, հունարեն անվանացանկում նշված է Βυττανίον: Ա. Հ. Մ. Ջոնսը Սոդոմենոսի մոտ հիշատակված այդ տեղանունն ուղղում է՝ Bittylus (A. H. M. Jones. The cities of the eastern Roman provinces. Oxford, 1971, p. 289). որը սակայն ոչ մի կապ չունի մեր ցույց տված Բիթլիայի հետ: Ցավոք, պատմական աշխարհագրության այնպիսի նշանավոր հետազոտողներ, ինչպես Վ. Տոմաշեկը (Wilhelm Tomaschek. Zur historischen Topographie von Kleinasien im Mittelalter. VIII Abteilung, Wien, 1891) և Է. Հոնիգմանը (Ernst Honigmann. Die Ostgrenze des Byzantinischen Reiches von 363 bis 1071. Bruxelles, 1935), որոնք մանրակրկիտ ուսումնասիրություններ են նվիրել Միջերկրածովյան ավազանի բնակավայրերին, չեն հիշատակում Բիթլիա տեղանունը:

⁷⁷ Iohannis Malalae Chronographia. Vol. 2, Lib. XI, p. 270—271 (Migne, t. 97 col. 509)

⁷⁸ Ըստ Ստրաբոնի Սելևկիա քաղաքը, որ նույնպես Որոնտես գետի ափին էր, Անտիոքից գտնվում էր 120 ստադիոն հեռավորության վրա, իսկ Որոնտեսի գետաբերանից, այսինքն ծովից՝ 40 ստադիոն (չորոշ 7 կմ, ատտիկյան ստադիոնը հավասար է 177,6 մետրի): Ստրաբոնը նշում է, որ ծովից մինչև Անտիոք ոտքով մեկ օրվա ճանապարհ էր՝ Որոնտես գետի հոսանքով դեպի վեր (Strabo, XVI. 2, 7): Քանի որ ըստ Դոմնինոսի, Բիթլիան գտնվում էր Սելևկիայի մոտերքում՝ ծովափին, ապա նրանց միջև եղած հեռավորությունը ևս պետք է կազմեր գրեթե 40 ստադիոն:

⁷⁹ Ենթադրաբար թափանք ի Միջագետաց զԱսորիս (Աշխարհացույց, էջ 37):

ղանալով գրավել քաղաքը, ծովի մոտ կանգնեցնում է հաղթական առյուծի կոթողը, որ խոստով կերպով խորհրդանշում էր մինչ այդ պարսիկների հետ հռոմեացիների կնքած «ամոթալի պայմանագիրը»:

XVIII դարի ֆրանսիացի պատմաբան Շարլ Լեբոն (1701—1778) «Բյուզանդական կայսրության պատմություն» բազմահատոր աշխատության մեջ, վաղ բյուզանդական մատենագրական ավանդության հիման վրա ներկայացնելով Հուլիանոսի փայլուն հաղթանակները Պարսկաստանում, գրում է. «Պարսիկները երկար ժամանակ Հուլիանոսի հաղթանակների թողած սարսափները արտահայտում էին ազդու խորհրդանշաններով: Այդ սրարշավ նվաճողին ներկայացնելու համար, նրանք սովորություն ունեին պատկերել շանթ կամ առյուծ, որից բոց էր ժայթքում, և վրան ավելացնում էին Հուլիանոս անունը»⁸⁰: Այս ավանդությունը բաղդատելով հորենացու հաղորդած տեղեկության հետ, համոզվում ենք, որ հիմնական կետում նրանք հաստատում են իրար, այն է՝ 363 թ. Հուլիանոսի Պարսկաստան կատարած արշավանքի առթիվ պարսիկները քանդակել կամ պատկերել են առյուծ: Տարբերությունը միայն մեկնաբանման մեջ է—հորենացին առյուծը համարում է Շապուհի հաղթության, պարսից արքայի հզորության խորհրդանշան, մինչդեռ բյուզանդական ավանդության մեջ սարսափահար պարսիկները առյուծի կերպարանքով ներկայացրել են իրենց ահեղ թշնամուն՝ Հուլիանոսին: Վերջին բացատրությունն ակնհայտ շինծու է և անբնական, որովհետև այդ անեղ թշնամուն էր, որ պարսիկներն իրենք ծանր պարտության մատնեցին և պարտադրեցին «ամոթալի պայմանագիրը»: Բացի այդ, Հուլիանոսի Պարսկաստան ներխուժելու և հռոմեացիների պարտության միջև այնքան քիչ օրեր էին անցել, որ պարսիկներն կրած «սարսափը» չէր կարող ինքնանվաստացման այդպիսի կերպավորում ստանալ: Մնում է կարծել, որ 364/5 թ. Վաղեսի հետ կնքած յոթնամյա պայմանագրից հետո, երբ պարսից զորքը հետ քաշվեց մինչև Մծբին, Բիթլիայի ծովափին Շապուհի կանգնեցրած առյուծի հուշայությունը մնաց հռոմեացիների տիրապետության տակ, որի վրա հույներն ավելացրին Հուլիանոսի անունը (այսպես էլ ասված է Լեբոնի մոտ) և ըստ այսմ էլ այն ներկայացրին իբրև Հուլիանոսի «հաղթության» խորհրդանշան: հորենացու ներկայացրած առյուծն ու մատյանը իբրև հաղթող Պարսկաստանի և հաղթված Հռոմի խորհրդանշաններ շատ ավելի համոզիչ են և տրամաբանական, քան հետին թվով վերիմաստավորված բյուզանդական ավանդությունը: Տարօրինակ է, որ Գր. Խալաթյանցն այստեղ ևս, հորենացու վկայությունը Շապուհի կանգնեցրած առյուծի մասին, համարում է ուշ շրջանի արդյունք, թեև չի ժխտում, որ «մինչև այժմ էլ պարսիկների մոտ առյուծն ընդունված է որպես Պարսկաստանի հզորության խորհրդանշան»⁸¹:

Ո՞ր աղբյուրից է օգտվել հորենացին քննարկված դրվագում. հարցի պատասխանը տալիս է ինքը՝ Պատմահայրը ոչ այս դեպքերի առիթով, այլ իրանի Արշակունյաց թագավորական տոհմից երեք պահավիկ ցեղերի բաժանման մասին պատմելիս: Նա հարևանցի հիշատակում է պատմադիր Եղիազարին, որն իր մատյանում շարադրել էր Շապուհ II-ի և Հուլիանոսի ժամանակ տեղի ունեցած անցքերը, որոնց և ինքն ականատես էր եղել: Պատմահայրը հաղորդում է նրա անձի մասին որոշ կենսագրական տվյալներ՝ նա ազգով պարսիկ էր, անունը հռոմեացու, եղել էր Շապուհ թագավորի դպիրը, բայց Հուլիանոս ուրացողի Տիգրան արշավելու ժամանակ գերի էր ընկել հույների ձեռքը և նրա մեռնելուց հետո Հորենոսի արքունական սպասավորների հետ տարվել էր Հունաստան ու քրիստոնեական հավատ ընդունելով կոչվել Եղիազար. «Եւ յոյն լեզու: ուսնալ՝ պատմագրեաց զգործս Շապուհի և Յուլիանոս»⁸²: Հասկանալի է, որ հռոմեացու-Եղիազարն իր պատ-

⁸⁰ Histoire du Bas Empire, par Lebeau. Nouvelle édition par M. de Saint-Martin. Tom III, Paris, 1825, p. 146.

⁸¹ Г. Халатьянц. Армянские Арпакиды, с. 237.

⁸² Խորենացի, Բ, հ, էջ 206.

սութունը գրած պետք է լինի արդեն իսկ Հորիանոսի հաջորդների՝ Վաղեն-տիսիանոսի և Վաղեսի կայսրության շրջանում: Չնայած որոշ հետազոտող-ների թերահավատությանը, Խորենացին պտրսկա-հռոմեական պատերազմին վերաբերող վերահիշյալ տեղեկությունները քաղել է IV դարի այդ պատ-սագրի երկից: Այս բոլորից հետևում է, որ Խորենացու հաղորդածն իրոք պատմական տեղեկություն է: Բյութանիայի հեռավարած պատմական անախրոստիզի առաջնորդվածը, որ ավելի քան հազար տարի համառոտ են օգտագործվում է կեղծ Մովսեսի լեզունդը հիմնավորելու համար, մեր կար-ծիքով պետք է համարել լուծված:

Շնորհիվ Մովսես Խորենացու, Բիթլիիս նախահանգիստ-խաղախանա-նր պեռք է իր տեղը գրավել պատմական աշխարհագրության բարտեզների վրա:

ГДЕ НАХОДИЛАСЬ ВИФИНИЯ, УПОМЯНУТАЯ МОВСЕСОМ ХОРЕНАЦИ?

А. В. МУШЕГЯН

Резюме

В своей «Истории Армении» Мовсес Хоренаци рассказывает (III. 17—18), что после похода римского императора Юлиана в Персию (363 г.) и его гибели персидский царь Сапор, преследовавший римское войско, достиг Вифинии и осел там на долгие месяцы, поставив на берегу моря колонну со львом в знак своей победы. В 1883 г. немецкий арменовед Альфред Гутшмид опубликовал в Британской энциклопедии статью «Мовсес Хоренаци», в которой утверждал, что персы впервые достигли Вифинии при царе Хосрое II в 608 г. И поскольку это событие известно армянскому историографу, А. Гутшмид заключает, что Хоренаци жил и написал свой труд в VII в. Ныне некоторые исследователи (К. Туманов, Р. Томсон) считают поход персов в Вифинию неопровержимым фактом, позволяющим перенести Мовсеса Хоренаци в VIII в. Однако на основании сведения латинского историка Аммиана Марцеллина (XXV. 4, 23—24), незамеченного до сих пор другими исследователями, доказывается, что впервые персы вторглись в Вифинию и достигли побережья Пропонтиды после 325/6 г. при царствовании Сапора II. В то же время изучение по греко-латинским источникам историко-географического материала, связанного с римско-персидской войной 363 г. и последующими событиями, приводит к заключению, что в упомянутом эпизоде у Хоренаци речь идет не о провинции Вифиния (греко-латинская форма: Битюния), расположенной у пролива Фракийского Босфора, а имеется в виду неизвестная до сих пор гавань Битюлия или Битилия, находившаяся в Сирии, на берегу Средиземного моря, близ города Селевкии (на реке Оронт). Об этой гавани и ее местонахождении упоминает хронограф Домнинос в связи с нашествием императора Траяна на парфян в 110 г. н. э. Свидетельство Хоренаци о проникновении персов до побережья Средиземного моря в 364 г. находит подтверждение в сообщениях Сократа, Созомена и Малалы. Таким образом опровергается один из веских доводов, послуживших основой для утверждения, что отец армянской историографии жил не в V в., а в промежутке VII—IX вв.